

東
華
續
錄

東華續錄

同治二十九年

臣王先謙敬編

臣張式恭恭校

十二月癸酉朔以全順爲內閣學士由翰林院侍讀學士遷○甲戌李鴻章

奏查浙江平湖賊酋陳殿選卽陳恩榮先於十月中赴潘鼎新劉

秉璋營中乞降並言城中不願投誠者半請謀定舉事及劉秉璋

苗涇張涇匯之捷擬分兵進扼新埭該酋遂請約期進取十一月

初六日潘鼎新派夏金標潘鼎立進紮廣陳以觀動靜劉秉璋派

聶桂榮張應魁由楓涇移紮新埭楊鼎勳出隊千竄劉秉璋進兵

鍾埭牽綴嘉屬各逆而絕該酋反顧之心初七日令徐道奎帶水

師夜偪城根該酋卽勒所部分圍各逆館開城迎我軍入當將僞

洗天安陶雲從等各館悍賊誅殺殆盡督令合城薙髮陳殿選率

陳殿魁王應海錢玉興朱六玉等所部萬餘人盡降初八日遂將平湖縣城收復陳殿選初約乍浦賊酋熊建勳同降熊酋未決十月二十六日乍浦僞天福甘姓密約內應請我軍夜襲之十一月初五日三更潘鼎新親督潘國揚潘鼎立等銜枚疾走過乍浦東門外牛橋賊壘賊睡中驚起我軍殺入鮮得脫者及抵乍城賊眾有備甘酋謀不得發潘鼎新當派各軍將鎗光山等處賊營四座分路踏毀殺賊數百名餘匪逃向沿海山坳踐死無算我軍天明收隊熊建勳懾於兵威始具稟乞降潘鼎新派員齎札進城宣諭初十日派丁壽昌唐宏成劉恩洲帶三營進紮乍浦城根自督潘國揚一營勒兵平湖南門外以俟十二日熊建勳率眾獻城當將乍浦城收復次日潘鼎新卽令熊建勳隨同唐宏成等隊前往海鹽該縣踞逆多熊酋舊部經唐宏成等反復開導立時迎官軍入

城澈浦鎮踞賊震懼思逃亦經熊建勳傳諭招撫十三十四等日
遂又將海鹽縣城及澈浦鎮收復潘鼎新劉秉璋商派四營駐守
平湖三營協守乍浦畱二營守金山衛以固蘇省門戶海鹽暫令
降眾自守臣查平湖乍浦海鹽各城相爲犄角與浦東金山接壤
爲滬防後路浙省東北沿海屏蔽該降酋等懾我軍威次第納款
浙賊藩籬已撤杭嘉踞逆首尾不能相顧據各降酋願率眾往攻
嘉興已飭潘鼎新劉秉璋等分別遣畱相機督剿惟聞歸逆鄧沆
明等率黨三萬餘人入援嘉興意圖復奪各城海鹽澈浦去蘇較
遠飭由潘鼎新等隨時酌調應援並令程學啟速攻平望嘉善以
圖牽制遊擊徐道奎首先入城搜殺梗逆請以參將儘先拔補並
賞加副將銜降酋陳殿選等殺賊歸誠應請旨分別給予獎勵
上諭議政王軍機大臣等李鴻章奏連復平湖乍浦海鹽各城一

摺海鹽澈浦雖去蘇較遠然無官兵派守仍令降眾駐紮恐不可
靠歸逆鄧洸明等三萬餘眾入援嘉興意圖復奪各城若復有失
則全功歸於烏有著李鴻章督飭潘鼎新劉秉璋妥爲調度隨時
相機策應勿稍大意並著飭令程學啟速攻平望嘉善此二城一
經得手便可會合浙軍圖取嘉湖劉銘傳受傷以後常州是否接
仗並著催令迅克以期漸次廓清餘杭杭州近日軍情若何左宗
棠前奏擬令劉典所部各營由昌化於潛趨臨安進剿孝豐規取
湖州並卽日親紮富陽督飭各軍先克餘杭然後悉力杭州分規
湖郡日來尙未見有奏報殊深廑繫該督全局胸羅前以髮逆圖
竄江皖故以全力協助會國藩防剿浙西保全後路未能分兵攻
剿嘉湖見在皖南州縣克復殆徧滬軍亦已收復乍浦海鹽等城
聲勢可期聯絡該督當督飭蔣益澧劉典迅圖攻克各城並派兵

與李鴻章之軍會合以圖嘉興湖州所有近日一切布置接仗情形著該督隨時迅速具奏李鴻章另片奏令黃翼升帶水師五營馳往臨淮已於十一月十五日啟程等語苗沛霖見已授首餘黨亦次第殲除臨淮一帶兵力足敷分布而蘇浙交界正在得手需兵助剿黃翼升如可畱在蘇浙一帶必能更爲得力著李鴻章咨商曾國藩唐訓方妥籌調度卽令折回或派在蘇浙一帶防剿或令扼紮緊要江口以益兵力均著妥籌調派戈登在崑山近日作何動靜並著附報奏聞將此由六百里各諭令知之○乙亥諭議政王軍機大臣等馮子材等奏官軍分紮甘棠橋南路屯逆壘以大股猛撲屢戰屢捷賊眾大創奔潰一摺忠逆遁往金陵其死黨仍在丹句一帶歸僞然王陳逆調遣僞護王陳坤書所部悍賊亦歸併丹句爲數甚多二十一二等日由馬陵分路撲營雖經各營

將士奮力擊退而官軍傷亡不少著馮子材魁玉督飭鎮營將弁
戰守兼資務將各路賊匪悉數殲除勿使覬覦鎮城久踞要地並
隨時偵探如常州攻勦業已得手卽酌量分軍會合滬軍相機進
取丹陽總須自行紮穩先爲不可勝以待敵之可勝諒該提督等
用兵有年必能領會也將此由五百里諭令知之○丙子諭議政
王軍機大臣等官文嚴樹森奏訪察原保知府身家不清據實檢
舉一摺據稱湖北補用知府周有全曾充前署嘉魚縣已故知縣
錢炳熙長隨蒙混投入軍營效力多年疊著戰績歷經官文胡林
翼李續宜唐訓方嚴樹森保奏洊升今職彼時未及詳其家世今
訪詢得實請將周有全拔去花翎革職永不敘用等語朝廷名器
不可濫膺周有全旣係身家不清經官文等訪查確實自應照例
辦理惟各路軍營帶隊人員流品不一若斯之類恐復不少周有

全旣以戰功卓著保升今職若遽將其罷斥在該員固無足惜特恐各路軍營其有出身卑賤未經查出者因之心懷疑懼貽誤事機亦不可不先爲籌及著該督等查明周有全見在管帶礮船於興郎一帶防剿究竟是否得力如或改膺武職有無窒礙之處著卽酌覈奏明再降諭旨將此諭令知之○諭熙麟奏雷正綰涇州獲勝一摺所奏涇州勝仗與雷正綰前奏情形略同甯夏靈州被陷之後該處軍情緊急見在雷正綰之軍搜剿涇州附城游匪當已淨盡其餘陶茂林之軍合力剿辦汧隴靈臺一帶後路各賊亦當悉數埽除卽著該提督一鼓作氣直取平涼由固原鹽茶轉戰而前進剿甯靈回匪克復城池迅殄兇鋒甯靈被陷時已旬餘該處逆情究竟如何甯夏滿城存亡未卜慶昫不見奏報時亦逾旬均著熙麟等迅速查明卽行馳奏以慰廑念熙麟另片奏馮元佐

被害程景鵬已經格殺等情仍著張集馨將程景鵬餘黨李彥彪劉錫俊韓可英高學太楊老五等逸犯五名嚴密緝拏務獲懲辦不准一名漏網惟熙麟所稱馮元佐戰功疊著被殺甚慘請給四品封典之處與多隆阿張集馨疊次所奏均不相符多隆阿等所奏馮元佐本非安分之徒歷有聚眾抗糧情事其被眾殺害皆因鄉民素來深嫉所致其團眾亦向不安分張集馨所奏馮元佐並有肆行劫殺等重情與程景鵬無異若不加查察遽行給予卹賞恐不足以服人心且熙麟所請賞給四品封典亦與體例不符著該督等再行確查如馮元佐尙有應卹之處亦卽另擬具奏將此由六百里諭知熙麟雷正綰並傳諭張集馨知之○予江蘇陣亡遊擊李世喜祭葬世職○丁丑諭內閣前因光祿寺卿潘祖蔭升任給事中卞寶第給事中朱潮及陝西在籍道員李宗沆等先後

參控副將閻丕敏道員李祝齡副將張維義施鵬於賊竄陝境未能堵禦各情並據多隆阿奏參閻丕敏有餽賊火藥情事復據參將盧殿標之妻赴京呈控問官勒供等情先後降旨交愛仁密查訊辦茲據審明定擬具奏此案陝西候補參將盧殿標於賊竄商南時任令紳民兩次餽賊銀兩該員既屬知情同議卽與通賊無異盧殿標著卽革職照擬斬監候秋後處決革職畱任甘肅中衛協副將閻丕敏雖查無擁兵自衛棄隘逃走餽賊火藥各情惟於參將盧殿標任聽民眾餽賊銀兩漫無覺察且身爲統兵大員辦理商雒防務於賊竄富水關時未能攔截實屬昏愎庸懦閻丕敏著卽行革職發往新疆效力贖罪革職畱任陝西候補道李祝齡奉委督辦民團於賊入陝境未能集團堵禦革職畱任陝西潼關協副將張維義帶兵援應雖無臨敵先潰情事惟接仗失利未能

過賊西竄李祝齡張維義均著卽行革職發往軍臺效力贖罪已
革副將施鵬奉調帶兵出省並不迅速進兵輒敢節節逗遛著卽
發往新疆充當苦差商南縣紳董廩生孟習孔貢生王允升從九
品銜井維憲監生張逢元等於賊匪圍城時並不協同守禦輒因
民眾攤銀給賊冀解城圍隨同附和雖非甘心餽賊然該生監等
非無知愚民可比似此苟且無恥罔知大義僅與斥革不足蔽辜
孟習孔王允升井維憲張逢元均著發往新疆效力贖罪其偷運
火藥送賊之保丁何老五著陝甘督撫一體嚴拏務獲從重治罪
已革道員戴鸞翔承審廬殿標一案訊無勒供等情毋庸再行置
議該革員前已降旨發往軍臺著卽與閻丕敏等一併交該地方
官分別迅速起解○諭前署廣西提督江忠義由文員帶兵剿賊
屢復名城戰功疊著以道員擢署貴州巡撫復歷貴州廣西提督

懋著勳勤本年夏間督兵赴援江西敗賊於湖口青陽江境肅清厥功尤偉方冀千城之選禦侮長資茲據沈葆楨馳奏該員以積勞傷疾舉發竟於新建縣屬之吳城病故中道殞折未竟其才披覽遺章殊深悼惜江忠義著加恩照總督例賜卹予諡其生平戰績著宣付史館立傳並於江西省城安徽青陽及本籍地方建立專祠准其入城治喪任內一切處分悉予開復應得卹典該衙門察例具奏伊子江孝詒著俟及歲時由吏部帶領引見候旨加恩以示篤念蓋臣至意尋予祭葬諡誠恪○諭議政王軍機大臣等張之萬奏張總愚股匪被擊東竄見籌會剿苗捻餘黨勾結汝南土匪竄擾信陽州境請畱毛昶熙督辦各一摺張總愚股匪由浙川之板橋川爲張曜偏剿乘夜出竄欲往魯山嵩縣交界四棵樹地方暫紮再繞由潼關西竄與陝省逆匪勾結張曜所部跟蹤追

擊賊由內鄉東北一帶竄至南召張之萬所派道員葛承霖湘勇已由宛郡而趨南召與張曜等追兵成夾擊之勢惟張曜等均由西南追剿而東北一面空虛路通河陝非得馬隊縱橫鈔截不能得力僧格林沁所派蘇克金帶領馬隊已至許昌卽著僧格林沁嚴飭蘇克金迅速進兵與張之萬所部及張曜之軍會合兜剿張之萬卽移軍汝州督飭色爾固善楊海泰等馬步各隊覘賊所向聯絡接應官文嚴樹森仍遵前旨速飭鄂邊各軍越境剿賊使賊面面受敵得以迅期蒞事免致再爲楚患並著張之萬仍飭畱駐荆子關之敖天印孫之友各營嚴防川匪與陝省官軍會圖藍逆蔣希夷周登高兩營搶紮四棵樹尤須飭令嚴密堵禦不可稍有鬆懈苗逆餘黨高三牛老逢等與正息土匪勾合竄擾信陽見踞游河集等處其勢尙張所奏銅鐘陡溝等處剿擊情形究竟是否

確實張之萬派出馬步各隊及毛昶熙所派之黃貴誠等營陸續到汝毛昶熙前已有旨令其暫留豫省著卽統率汝南諸軍速將游河集等處大股實力殲除張之萬仍飭總兵李殿元知府劉成忠等將見踞談家園之袁王兩寨餘匪一鼓聚殲毋留餘孽宛汝之間地屬毗連且多險扼該撫與該侍郎尤應速圖埽蕩毋使各匪得以竄合爲患致勦辦又形費手將此由六百里各諭令知之○諭前據御史華祝三奏沈葆楨假期將滿請令照舊供職當經諭令會國藩沈葆楨各泯畛域勿存意見並令該撫於假滿後卽行銷假任事茲據沈葆楨奏已於十月初三日銷假視事並瀝陳與會國藩共事情形尙無意見不合之處該二臣果能屏除己見共濟時艱東南吏治軍務均可籌商整理朝廷亦藉以紓南顧之憂此後該撫當與會國藩益加和衷遇事妥商籌辦以期於事有

濟匪首羅衍義等糾眾滋事圖占城池經各該地方官捕獲先後正法辦理尙屬認真惟散處餘匪尙未按名弋獲著卽督飭各該地方官設法搜捕淨盡毋任一名漏網其茶陵酃縣攸縣各處餘匪並著按照匪首吳青雲圖內所載姓名咨會惲世臨派委文武協同會拏務期淨絕根株不准稍畱餘孽江西副將唐星照尙在湖南原籍著沈葆楨卽知會惲世臨飭催該副將迅由湖南募齊勇丁趕赴劉蓉軍營毋稍延誤劉繹年力衰頽卽著毋庸來京江忠義所部將士久經行陣亟須遴員統帶著該撫商同曾國藩迅速辦理將此由四百里諭令知之○諭丁曰健奏剿破該投老巢撲滅逆匪巨股一摺臺灣官軍自攻克水裏港福州府等數十匪莊北路逆匪漸就窮蹙逆首陳鯁等率黨竄守該投老巢經丁曰健派令文武員弁移營進逼由水師營等處奮力進攻擒入該投

莊內生擒僞先鋒等多名全股匪徒殲斃殆盡立將葭投克復自
彰化龍頭地方至大肚溪以北匪莊四十餘里一律肅清著丁曰
健乘勝進攻彰城迅圖克復見在林文察已飭林文明募勇馳赴
嘉義縣城著左宗棠徐宗幹飛飭林文明趕緊招募齊集啟程會
合曾元福各軍進攻斗六丁曰健亦卽乘此聲勢會合各軍分路
進取迅克彰城埽清羣醜毋稍延緩將此由五百里諭知左宗棠
徐宗幹並傳諭丁曰健知之○予甘肅殉難總兵官呂元等祭葬
世職建祠○戊寅 上詣 大高殿祈雪○曾國藩奏僞忠王李
秀城自蘇州逸出統眾數萬分布丹陽句容龍潭石埠橋等處初
十日忠逆率數百騎由太平門入城會國荃令蕭孚泗李祥和等
在附城一帶修一月牆十三日賊出大股來撲我軍力戰卻之賊
亦傍城增壘防我地道我軍復於十六夜力攻破之疊據降賊供

稱忠逆既至金陵勸洪逆棄城同逃洪逆不從忠逆有向甯國縣繞越開化玉山入江西之議臣已咨商左宗棠沈葆楨嚴防東路其西路爲羣賊上犯熟徑處處可通臣於徽甯池三屬派兵分守十城江西之東北邊境如石門洋塘景德鎮等隘亦經沈葆楨逐段設防惟尙欠大枝遊擊之師頃因贛南防務已鬆臣函商沈葆楨調韓進春一軍回顧饒景重地以期有備無患上諭議政王軍機大臣等前據李鴻章等奏忠逆遁回金陵有挾洪逆之子上竄江西之說疊經諭令曾國藩左宗棠沈葆楨等豫爲防範仍著恪遵前旨嚴飭皖南諸軍力守要隘毋令該逆乘閒上竄江西防務緊要卽會同沈葆楨迅將韓進春一軍調回饒景扼紮毋稍疏虞將此由六百里諭令知之○允閻敬銘奏設局抽收蘆鹽釐金○廣江蘇甘泉縣學額六名○予江蘇等省陣亡知府朱聲隆等

祭葬世職○己卯諭議政王軍機大臣等熙麟雷正綰奏官軍攻克王村花所鎮匪巢連獲大勝並雙廟集勝仗殲斃賊目木三各摺片雷正綰前抵甘省卽已屢獲大勝此次踏平王村花所鎮逆巢南北兩原之賊相繼竄匿自當乘此聲勢節節掃除著雷正綰督飭各將士先將杜家溝逆巢攻克並催令曹克忠相繼兜剿熙麟卽飭附近各州縣一體率團堵禦以壯聲威陶茂林在汧隴一帶當已將餘匪一律殄滅著多隆阿卽催令該提督將靈臺崇信華亭等匪剋日殄除會同雷正綰大軍進取平涼固原廓清甘境用慰朝廷西顧之憂多隆阿近日病勢若何會否輕減盤屋圍攻已久何以尙未克復炸礮爲攻堅利器是否敷用該大臣營中熟諳施放者諒不乏人著嚴飭穆圖善等實力攻拔毋任久踞甯夏漢城失守後侯雲登及城中文武各員有無下落滿城近日戰守

若何久未據慶昫奏報殊深懸繫著熙麟迅將甯夏實在情形備細訪聞據實具奏將此由六百里各諭令知之○庚辰諭內閣官文奏各省優貢業經奉旨准照拔貢一體覆試錄用湖南省選舉優貢悉照中省定額辦理一摺湖南省近歲以來人材蔚起講求實學卽如各路軍營以諸生而委身戎馬建立勳勞擢膺封疆大帥之任者不一而足庠序之中經明行修踐履克敦者諒更不乏其人加恩著照所請湖南選舉優貢准與湖北一律按照中省四名定額舉行卽以同治三年甲子科爲始由該省學政會同該督撫覈實辦理該督撫學政等仍當慎選真才考求素履爲國儲賢以收實用如或不得其人仍當任缺毋濫以體朝廷循名責實之意見當破格求材之際各直省於優貢一途均當痛除向來虛冒積習訪舉潛修積學之士廣其登進爲國得人以副殷望○李鴻

章奏臣前飭程學啟李朝斌水陸各軍進攻平望以圖嘉湖二
二日程學啟令劉士奇所部兩營由南廂進紮梅堰塘防湖州之
賊來援餘營分三路進攻李朝斌督水師由汾湖兜剿查平望之
賊於鶯脰湖南北岸築石城二座土壘三座皆憑河爲濠異常堅
固以巨石沈舟填大河而以木椿阻小河船不能行我軍甫至賊
突出二三千人隔河密放洋槍程學啟督王永勝等併力擊退是
夜四鼓時賊分兩路劫營我軍聞聲密令各勇潛伏蘆葦伺賊漸
近突起迎之賊復退回二十三日程學啟等分路進攻賊先以大
礮遙擊近則偃旗不出我軍開放炸礮數十各勇隨煙擁進正在
得手嘉興援賊突來萬餘我軍一面急抽師船迎剿援賊一面仍
併力緊攻連開大小炸礮五百餘斃悍賊多名立將各壘攻破賊
閒有乘舟逸者悉爲槍船截殺屍骸山積計擒斬頭目三十餘人

悍黨四五百人燒毀賊船五百餘隻奪獲礮船百餘隻援賊氣奪遁走水陸追殺十餘里復擒斬數百人二十四日程學啟令王永勝等進攻九里橋李朝斌自督兩營由鶯脰湖會剿立破賊營二座追斬百餘人淹斃無算復會劉士奇等與水師進攻黎里斬數十級賊已狂奔該處賊營二座亦破平望附近一律肅清程學啟派吳毓棻陸師兩營填紮平望兩石城其三土營立即平毀李朝斌派水師兩營泊鶯脰湖相爲依護並令費金綬礮船紮牛頭河以杜繞竄之路臣查平望一鎮東連嘉興西連湖州南通杭郡實爲蘇浙樞紐浙賊多聚精銳守此要隘見經我軍攻克嘉湖失此藩籬踞賊當已奪氣仍當飭令程學啟等乘勝相機與潘鼎新劉秉璋各軍夾擊併圖嘉興所有此次出力陣亡各員相應開列請旨分別獎卹又奏李鶴章劉銘傳等進剿常州自十一月十五日

攻克東北門外倉橋寶塔邊一帶賊壘我軍紮營進逼十七日李鶴章約會劉銘傳各營環攻小北門外大土城賊以槍礮抵拒我軍力攻四時之久暫行收隊是夜二更李鶴章復派張樹聲等進攻賊仍死拒張樹聲親督弁勇運草填濠猛撲以火彈焚燒賊棚董鳳高率眾殺入手刃悍賊數十名各軍擒斬數百名逸者無多遂將小北門口大土城攻克先是常州西路奔牛踞賊邵志倫羅墅灣踞賊夏登山萬錫階石橋灣踞賊張邦振等共十餘石壘有眾數千至劉銘傳營中乞降許之派水師營官鄭龍彪靳春和帶戰船前往部署復令道員馮席珍往督戰守奔牛至小河口運道已通惟小河口沿江數里之孟河汛城尙有賊踞十三日城賊由西門出撲降眾各營孟河賊亦糾眾從西猛攻靳春和馮席珍督同邵志倫等將城賊擊退十四日乘勝進攻孟河賊閉關拒守靳

春和激勵降眾一鼓前進拔椿越牆而入踞賊千餘擒斬殆盡當將孟河汛城攻克李鶴章劉銘傳商派黃桂蘭一營率降眾紮守奔牛以扼丹陽來路二十日忠逆派僞章王大股由句容來援已抵西門三里街李鶴章令張樹聲等分攻各門牽綴城賊自督周盛波等九營專剿援賊而令郭松林紮大南門之左架礮轟城午刻章逆護逆治逆糾眾五六萬分列西南前來迎拒李鶴章分兵三路進擊自率童邦喜等在後策應章逆徑撲中路經余思樞等擊退追至三里街賊營賊未入壘當被我軍踏毀土營四座擒斬五六百名護治二逆從兩旁鈔襲周盛波余拔羣分路截之章逆又率眾回撲余思樞等合力痛擊逆勢稍卻李鶴章令童邦喜等遠包西南五里之外飛調郭松林率槍隊徑撲大南門賊卡使賊處處受敵申刻我軍各路衝入賊遂大潰追過西門七里橋又破

賊營三座埵斬溺斃二千餘人臣查孟河汛城爲沿江要口經我軍攻克則常郡之賊斷難由此北竄護逆踞城死守惟侍忠逆來往應援疊受痛懲援逆亦漸不振仍飭李鶴章劉銘傳等合謀偏勦力圖克復又奏欽奉諭旨都興阿片內有探聞忠逆欲合護侍各逆乘火輪船礮船竄擾江陰著李鴻章迅籌布置防其由江陰口岸渡江而北臣查江陰城最險固置守尙易前因駱國忠自告奮勇協勦常州當飭其分帶二營隨劉銘傳進攻卽由李鶴章添撥張士芳等二營赴江陰填紮協守劉銘傳見圍常城西北李鶴章圍偏東南僅西門正面未圍又招撫奔牛降眾攻克孟河賊壘不但忠護各逆無繞竄江陰之路並不能由常州境內出江北竄忠逆所購小火輪船聞已繞赴溧陽刻下游氛雖眾賊膽甚虛如果南北岸各軍鎮定堵勦該逆似不至由此北竄又奏浙江海鹽

縣城於十一月十三日收復後十五日璵城踞逆左元舉糾眾數千來犯該處踞海鹽十三里當經潘鼎新派唐宏成等帶隊前往督同降酋熊建勳將賊擊走卽將璵城石壘攻毀賊退至沈蕩乘勝追殺餘賊遁入嘉興潘鼎新令降酋吳秉權等分紮三營於璵城犄角堵禦方政德紮二營於三環洞橋對面以防嘉賊從小路鈔後十七日嘉興桐鄉石門各逆大股並撲璵城僞會王蔡逆由海甯徑撲澈浦海鹽潘鼎新派丁壽昌唐宏成等分道馳援十八日唐宏成抵海鹽北門飛飭降眾嚴守璵成自督熊建勳等繞出沈蕩截其歸路擒斬數百名賊始潰退其撲海鹽之賊經丁壽昌等督率降眾扼南門外之駱駝橋鏖戰兩時賊亦潰敗追剿十餘里蔡逆遂併趨澈浦該處城廢降酋李汶楚等分紮城外已被賊圍奮死抵禦我軍追至偪剿賊乃敗回臣聞聽歸各逆黨眾均集

嘉興杭州海甯等處該逆雖經擊退必復來爭潘鼎新兵力較單暫撫降卒而用之臣飭其父爲控馭並帶所部各營移紮乍浦扼海口形勝之地兼顧平湖復調唐宏成協守海鹽劉秉璋由嘉善進取程學啟由平望進紮亦得面面牽制之勢仍飭各軍穩慎以圖互爲策應又奏臣欲保蘇滬門戶不能不進圖浙西以剿爲堵各城踞逆抗拒者設法攻打投誠乘勢招撫潘鼎新受平湖乍浦海鹽之降臣意初欲盡遣之劉秉璋潘鼎新等皆以前路賊勢尙多地形散漫我軍分布防剿實苦單薄且與浙軍中隔杭嘉海甯各城難遽聯絡誠慮逆眾鋌走或有潰裂之時不得已暫就降人可用者撫而畱之准該降酋備資自效仍隨時籌捐接濟此目前權宜辦法臣飭潘鼎新等嚴明約束力禁騷擾平湖乍浦守事我軍主之海鹽則我軍督降眾守之似尙操縱由我惟左宗棠行營

相距較遠自杭來蘇必須繞由甯波渡海新復地方不可一日無官若拘泥文法俟浙省委員來署恐多遲誤且與客軍及降人雜處或且裹足不前可否變通辦理倣照前湖北撫臣胡林翼進剿安慶太湖潛山由鄂委員代理地方成案暫由臣慎選妥員於收復浙省府縣時就近暫委代理以便調協軍民彈壓撫綏仍咨明浙省備案俟浙江委員到後再飭交卸或俟杭城克復左宗棠兵力能及再統由浙省覈辦其暫畱降眾仍責令經手人員逐漸遣散伏乞 聖鑒訓示 上諭議政王軍機大臣等平望鎮爲蘇浙兩省樞紐賊之精銳併聚程學啟等各軍破壘之後賊猶格鬪逾時則其兇悍可想李鴻章見派陸營填紮奪賊石城並以水師泊驚脰湖礮船紮牛頭河以杜賊匪繞竄之路常州各軍攻破孟河汛城擊退句容來援悍賊海鹽之軍攻奪與城石壘李鴻章以賊

中聽歸各逆酋均集嘉興杭州海甯等處必復來爭潘鼎新所部兵力稍單暫撫降眾用之並帶所部移紮乍浦以扼海口形勝兼顧平湖復調唐宏成之軍協守海鹽而程學啟由平望進紮劉秉璋由嘉善進取以爲面面牽制之勢辦理均極妥協卽著李鴻章督飭各軍穩慎進攻不可稍涉大意嘉興克復卽與浙省之軍會取湖杭常郡克復卽與鎮城之軍會攻丹句並著會國藩隨時妥籌兼顧商令曾國荃乘此賊勢大蹙面面受敵之時相機進取擣穴擒渠毋令洪逆與李秀城伺隙圖竄左宗棠亦卽督令浙西各軍迅速進攻期與蘇軍聲勢相倚以收夾擊之效忠逆之子句結丹句悍賊黃逆撲犯甘棠橋官軍新營馮子材所派各軍力戰退賊殲厥渠魁鎮城戰守尙爲穩固仍著馮子材等嚴行備禦防剿兼施並著都興阿嚴防北岸以杜竄越與南岸馮子材等聲息相

應援常郡該逆究在何處著曾國藩李鴻章查明具奏將此由六
百里各諭令知之○李棠階疏薦道員王檢心黃宅中知府齊琮
原峰峻等堪備任使命來京○辛巳諭內閣吏部奏遵議巡撫處
分請旨降級畱任等語安徽巡撫唐訓方於苗逆圍攻蒙城時未
將馬新貽一軍調回復未能親督兵勇迅速赴援已屬措置乖方
其奏報收復懷遠情形亦復含糊未能明晰經僧格林沁遵旨查
明據實覆奏該部議以降三級畱任不准抵銷唐訓方既於調度
軍務一切未能合宜卽屬難勝巡撫之任著卽開缺以布政使降
補○諭議政王冠機大臣等前據僧格林沁遵旨覆奏唐訓方於
皖北軍務措置乖方降旨交吏部議處本日據吏部議以降三級
畱任不准抵銷尙覺從輕已明降諭旨將唐訓方以藩司降補安
徽巡撫令喬松年補授矣喬松年接奉諭旨卽著馳赴新任所有

應辦事宜卽著實力整頓次第經理皖北地方新復投誠各圩人心尙未大定苗逆捻孽潛匿散處搜捕安撫均關緊要喬松年受朝廷拔擢之恩身膺重寄於地方吏治軍務均應實力講求以期無負委任該撫初抵皖省情形尙未熟悉一切勦撫機宜並地方應辦事件著僧格林沁會同藩隨時指示喬松年亦當隨時咨詢商榷以期辦理盡善至江北糧臺必須大員督辦關係甚重萬啟琛已調補江甯藩司著曾國藩飭令迅赴江北辦理糧臺事宜以資接替而重職守將此由四百里各諭令知之○以喬松年爲安徽巡撫調萬啟琛爲江甯布政使以劉卬膏爲江蘇布政使郭柏蔭爲江蘇按察使

由督糧道遷

○壬午諭議政王軍機大臣等本日據

步軍統領衙門奏湖南已革巡檢李際晟遣抱告家人吳汰呈控知府李逢春等挾嫌參革監禁擬遣一招屬員於被參後訐告上

司例應立案不行惟覽該革員所控呈詞各款如李逢春覓得張姓婢女獻於毛鴻賓作妾佞諛希寵並主使毛鴻賓私那庫銀五千兩賄通肅順旋因肅順伏法毛鴻賓差武弁張玉恩乘驛追趕又李逢春爲楊鼎勳等屢謀優缺庇護怨仇於親喪期年之內買娼爲妾包庇劣幕江錫九強娶良女爲妾王一陶等新置田房極多並經歷李撫辰等皆爲李逢春執鞭通賄等語如果屬實於吏治官箴大有關繫毛鴻賓見今升任兩廣總督其眷口自已攜赴任所著瑞麟就近嚴密查訪該督之妾有無張姓婢女是否李逢春所獻據實奏聞其委同知江肇成帶銀到京賄通肅順及李逢春楊鼎勳胡鏞黃維瓚等朋比爲奸各情節仍著官文密派妥員逐一確查覆奏毋稍瞻徇原呈一件單一件均著鈔給官文瑞麟閱看將此各密諭知之○諭前因山陽敗匪竄犯商南疊經諭令

李雲麟回軍勦辦茲據該京卿奏商南之賊有藍斯明等夾擊定可收功目下各營將抵興安斷難再退聞西鄉踞城之賊因楚師西上已有懼意此時進攻西鄉則漢中可望轉機退勦川匪則興郡亦成危局見時賊匪由富水關竄至鄖西之趙家川等處據生擒賊供該逆欲分爲兩枝一由鄖西下四十里之天河口偷渡一由鄖陽上三十里之武陽等處偷渡竹山竹谿回川武陽一帶有梁作楫截勦鄖西一路經李雲麟調總兵蔣運喜率義勝兩營回援並派水師前往堵截等語著官文嚴樹森卽飭令梁作楫等將武陽等處股匪實力殲除如兵力尙不敷勦辦卽著酌度調派務將此股竄匪盡數殄滅毋任再有竄越李雲麟旣經劉蓉調赴興安著卽將西鄉踞匪先行攻克會商劉蓉分路進兵以期節節掃蕩該京卿旣稱進兵之後僥所辦不能有功卽請置以重刑諒心

確有把握如任漢中之賊竄犯興安闌入完善之地定惟該京卿是問另摺一件畱中備覽將此由六百里各諭令知之○諭惲世臨奏楚軍防剿髮匪及苗教各匪情形請飭黔粵兩省派兵會剿一摺李七爲李幅猷悍黨兇狡異常黔中苗教各匪雖煽亂數年其眾究係烏合若再與該逆合而爲一習其伎倆必爲楚粵黔三省大患此股悍匪竄入黎平境內爲時已多總未據勞崇光張亮基將實在剿辦情形詳細入告該督撫不乘賊匪初至之時迅圖殄滅必待該逆養成羽翼滋蔓難圖重煩兵力貽誤封疆自問當得何罪著卽選派得力兵勇趕赴黎平一帶迎頭截擊盡殲醜類不准再有遲誤黎郡與楚粵犬牙相錯防不勝防苗教各匪又有下竄沅晃之勢亟宜豫籌布置著張凱嵩遴派勁旅由融縣懷遠等處進兵會合夾擊惲世臨仍飭周洪印等軍力扼要隘一俟黔

粵兵勇到齊卽行出境會勦務將李七一股悉數掃蕩庶苗敎各
匪懾於聲威勦撫均易得手該督撫等務當合三省兵力殄此巨
患肅清邊陲不得各分畛域貽誤戎機正在寄諭閒據毛鴻賓奏
生擒李幅猷詳細情形李幅猷擒獲前據惲世臨奏到業經明降
諭旨宣示矣至陽山縣一帶土匪竊發亟應迅速勦除著督飭張
運蘭移軍前往拏辦總期盡數殲擒不准一名漏網致畱餘孽毛
鴻賓另摺奏歷陳廣東釐務情形期於興利除弊等語辦理釐務
全在經畫得人方能涓滴歸公而商民亦不至掇累該督務當會
商郭嵩燾董率屬員力除積弊覈實抽收以奏裕國恤商之效將
此由六百里各諭令知之○諭蒙古王公貝勒貝子等前因有人
控盜匪白凌阿在土默特旗地方燒殺姦淫結盟搶掠其外甥彌
勒僧格相助爲惡疊經降旨查拏而白凌阿至今尙未拏獲其彌

勒僧格一犯由吉林解往熱河行至大石橋店門又復乘閒逃跑見聞白淩阿彌勒僧格均仍逃入土默特敖漢旗籍該旗王貝勒等並有底護隱匿情事近來各旗地方馬賊橫行正當認真協緝如罪大惡極之白淩阿等尤當嚴拏務獲豈容任令脫逃土默特貝勒薩木巴勒諾爾贊敖漢札薩克郡王達微都克丹平日不知振作近復庇護盜匪情殊可惡著該王貝勒及蒙古王公貝勒貝子會同巡緝迅將白淩阿彌勒僧格二犯拏交熱河都統審辦儻能迅速緝獲該蒙古王公等捕務勤奮必當量予恩施若敢任意容隱縱盜養奸將來別經發覺訊明由何旗隱匿定將該旗之王公貝勒貝子等治罪決不寬貸至盛京吉林熱河等處遇有馬賊出沒官兵捕拏之際如竄入蒙古各旗地界則該蒙古等尤當協同會緝實力搜捕其有公文移會該旗之處卽當迅速移覆彼此

聲息相通互爲巡緝以清奸宄不准顛預了事置之不答該蒙古王公貝勒貝子等迅卽遵諭行○予貴州黎平陣亡知縣韓夢琦入祀昭忠祠○癸未諭議政王軍機大臣等前因張集馨奏山陽竄賊逼近商南李雲麟追斬無多全軍西行李雲麟所派之守備龍常於石泉一帶地方滋擾逗遛請旨革職並請將統兵礮船得力之周有全暫署陝安道篆等情先後降旨允准茲據李雲麟臚列張集馨居心險詐徇私廢公各款蹟奏參一摺據稱該京堂攻克山陽血戰二十餘次張集馨則奏稱並未出隊該京堂之軍入陝後張集馨不給餉需且札飭所屬不准應付絲毫於營官則任意札付撓亂將弁莫知適從張集馨曾受署石泉令陸堃私惠署陝撫後惟其言是聽陸堃以餽賊爲守備龍常所訐因誣龍常以退守時兵勇滋擾張集馨卽具奏參革並函致陸堃以快其心周

有全曾充長隨因黃緣陸堃得以署理陝安道前李雲麟統軍抵興安時該署知府謝復榮以奉有張集馨嚴札不准兵勇入城且云恐有通賊情事致各勇聞而驚疑各等語李雲麟督軍援陝所需月餉楚省僅供其半張集馨身任封圻理宜札飭地方官設法接濟若果如李雲麟所奏則張集馨有意掣肘不顧大局實出情理之外惟李雲麟所稱楚軍驚疑解體幾成不測未免意圖聳聽李雲麟於山陽竄賊未能追剿屢奉嚴旨詰責今乃云非將士之前實糧餉之不繼是否巧於藉詞至龍常一員有無逗遛滋擾情事抑係張集馨偏聽誣劾周有全見已撤陝安道署任其從前有無黃緣陸堃陸堃有無隨同鄉民餽賊情事張集馨之札飭所屬不准給餉不准兵勇入興安府城及鈐制李雲麟所部將士究竟是何居心是否屬實著劉蓉按照李雲麟指參各節確切查訪

秉公據實覆奏母稍偏袒徇隱致有不實不盡陸埜如實有前項款蹟卽著撤任奏參原摺著鈔給閱看將此密諭知之○諭駱秉章奏漢南賊勢蔓延甚廣剽悍大隊膺聚黃官嶺等處銳意窺川此時劉蓉若徑帥各軍出青石關以規漢南賊得分道衝突以全力抗拒難期得手須俟新募楚勇到齊兵力旣厚數路並進大張撻伐漢中可望肅清川境不至蹂躪等語自係爲愼重軍務起見惟漢中賊勢狡獪與其各處設防不如一律進剿且劉蓉受命撫陝將及半載該撫於九月間奏請派員回湘募勇三四千名有計須臘底取齊三路進剿之語並云俟所調果後九營到後親自統率進駐青石關激勵諸軍先固川疆門戶駱秉章見飛飭果後九營由保甯馳赴巴州聽該撫調遣並調參將許蔭棠一軍馳赴通江及武字定武兩營黎鴻鈞所部六千餘人分布各隘兵力不爲

不厚卽新募楚勇計時亦應到川著劉蓉卽行統率各軍星速前進駐紮青石關力圖克復漢中城固等處會合李雲麟等約期進攻以符三路進剿之原議李雲麟昨奏通籌大局以西征爲急目下行抵興安聞西鄉踞城之賊因楚師西上已有懼意此時進取西鄉則漢中可望轉機等語當諭令該京卿卽照所請速攻西鄉踞匪並會商劉蓉分路進兵以期節節掃蕩該撫務當與駱秉章妥籌迅進並與李雲麟商酌辦理以解漢南倒懸之危近數十日未接劉蓉來報是否已由巴州進紮青石關並著迅速馳奏無得任意遲延盧又熊是否死於城固城下其餘文武下落究竟若何畱壩襄城新集一帶賊勢若何沔縣如何收復之處據駱秉章奏難以確探著劉蓉於行抵漢中後查明速奏將此由六百里各諭令知之○甲申諭議政王軍機大臣等都與阿奏南岸逆匪竄擾

水師獲勝情形並總兵稟詞張皇各摺片孟河以上超瓢港一帶
有賊匪滋擾經總兵吳全美親督礮艇擊退並將圍攻小河石橋
灣降眾營壘之賊擊敗該將軍見飭遊擊鄭啟貴管帶援兵二千
於渡江後卽紮丹徒鎮沿江策應著卽督令實力巡防並飭水師
各營將士嚴密堵截毋任逆蹤偷渡北岸沿江一帶陸洲既有賊
蹤卽著都興阿嚴飭水師剿洗不可任其久踞致滋蔓延前據李
鴻章奏稱招撫奔牛降眾攻克孟河賊壘等情見在小孟河地方
賊勢甚熾必須江北援師協力進剿隨時策應毋令降眾營壘爲
賊困偏該營降眾係何人爲首並著都興阿查明具奏泰興靖江
一帶都興阿亦當飭令在防將士嚴加防堵以保完善至總兵黃
開榜接准吳棠函開有豫勝營軍火等件來至蔣壩並委員家信
有所說豫勝營礮船不知是何命意等語見在李世忠在臨隨剿

立功尙未回防黃開榜聞該營礮划駛至三河卽飛稟請調水師入湖防守恐涉張皇致駭聞聽據都興阿奏所鈔委員家信詞亦含混無甚確實何以吳棠輒由六百里排單行知黃開榜見在情形究竟若何著吳棠確切查明具奏並著都興阿吳棠於豫勝營將士經過地方妥爲駕馭毋稍輕率將此由五百里各諭令知之○予安徽蒙城傷亡總兵官王萬清祭葬世職加等諡勤勇○乙酉 上詣 大高殿祈雪○諭議政王軍機大臣等據官文等遞陳團練流弊情形等語團練本以輔官兵之不足止能用之於暫不能持久可以戢土匪不足以當大敵本日據官文嚴樹森所陳甚爲明晰著照所擬仍由各該州縣自行經理鄂省西北邊防正當喫緊官文嚴樹森當飭各該州縣不可廢弛團務又必須選擇賢能之地方官督率紳民認真妥辦俾守望旣可以相助而權亦

不至歸諸民間仍一面練兵籌餉力求制敵強兵之策方爲不負委任將此諭令知之○諭多隆阿奏遵籌全局一摺所奏東南軍務及善後事宜均與前寄諭旨大意相符西北陝甘一路係多隆阿專責整厓圍攻已久屢據該將軍奏稱卽可得手此次復稱藍逆外援已絕著卽督令穆圖善等迅卽進攻克復此城其漢南之賊與洋縣之賊互殺並可因賊自相擾亂之際乘機蹈躐擄用閒出奇以圖漢洋之賊鳳縣地方團勇旣將兩當竄賊擊退整厓攻克後自可速行分兵埽蕩畱壩等處踞賊漢南軍務迄未得手節經催令劉蓉迅卽由川入陝以資統率該撫軍威重整新募勇營約亦可到諒必不日可以進兵藍二順股匪尙在商南藍斯明所部嚴扼武關兵力尙單會否分兵往助著卽飭令實力籌勦與豫省畱駐荊子關之敖天印等軍會合速將趙家川黃家壩一帶之賊

殄除麟遊餘匪曹克忠何以尙未全行埽蕩亦卽督令趕緊辦理以爲雷正綰後路策應甘省甯靈旣陷許久慶昫不見續報恐甯夏滿城亦不可知著多隆阿探查實在是何情形隨時具奏該處回氛尤熾雷正綰之軍必須續克平固轉戰而前以彰捷伐並著飛催陶茂林速將鳳郡料理就緒迅由汧隴進發與雷正綰會合以厚兵力至所請將畱守廬州之石清吉梁美材等七營赴陝助勦及江南兵勢稍紓另撥數營馳赴陝營之處均俟僧格林沁會國藩等遵籌大局情形覆奏到時再行酌量諭知辦理原摺畱中備覽將此由六百里諭令知之○丙戌諭議政王軍機大臣等前因麟興等奏派員查勘科布多所屬之哈屯河一帶行至庫克烏蘇因路險林雜不能前進當經諭令該大臣揀派妥員探明路徑前往茲據麟興奏稱委派驍騎校瑞成等四員名於九月二十五

日啟行十月初七日據該委員回城稟呈於九月十四日由阿勒坦淖爾烏梁海游牧查至庫什業莫多吹河地方見有俄人十餘名在彼貿易並無兵隊阻截十八日至海青大壩雪大無路可行請將人馬落入雪內之筆帖式存保鼓勵等語所奏殊未明晰瑞成等係九月二十五日前往查勘何以九月十四日行抵阿勒坦淖爾烏梁海地方又何以十月初七日即行回城往返如此之速且此次委員業已行至海青大壩是否由庫克烏蘇經行若已過庫克烏蘇則前次委員所稱路險林雜實屬荒謬自應將該委員據實參劾乃麟興並未將一路查勘情形詳敘但據瑞成等大雪封山不能前進等詞率行入奏而措詞又多自相矛盾之處可謂糊塗已極著麟興明白回奏疆界重務不得不認真查辦豈可半途而廢轉瞬春融雪霽仍著麟興嚴飭原派之委員瑞成等前往

哈屯河查勘明確俾與俄人分界時得以斟酌定議儻該委員等託故不前卽著從嚴參辦存保並未行至應行查勘之處有何微勞足錄所請賞加五品頂帶著不准行將此諭令知之○追予江西故道員屈蟠附祀提督饒廷選道員羅澤南祠提督饒廷選廣信府專祠並入都司李棉兆張時雨等章田渡合祠作爲正祀○予江西陣亡學政劉焜元祭葬世職○丁亥諭議政王軍機大臣等張凱嵩奏擊潰橫州股匪見攻黃逆老巢並擒斬蒼梧藤縣土匪安插懷集等處難民各摺片黃逆踰伏平天寨又遣黨分竄橫州妄冀死灰復燃經張凱嵩派令劉坤一等督軍截擊水陸獲勝擒斬賊匪多名橫州一帶均已廓清剿辦甚屬奮勉惟黃逆負隅阻險李亞得隻身逃遁均難免再事勾結復成巨患亟應乘此聲威督軍剿洗著卽督飭劉坤一等統率全軍併力攻取賊寨務須

殲除首惡以靜根株投誠之甘汰然等眾仍飭令妥爲撫馭潘炳
是否殲斃仍著查明具奏另片奏道員蔣澤春將范亞音之養子
梁亞五與范逆家屬在石表山擣巢聚殲罕有漏網藤縣匪首陳
超蘭等經副將唐元芳督剿窮蹙脅從各匪斬陳超蘭以獻顙顙
投誠業經唐元芳督該處紳團遣散惟蒼梧藤縣逸盜土匪恐復
不少該撫仍當責令蔣澤春唐元芳等實力搜捕卽遣散安置各
匪亦隨時令地方文武查察如有依險聚眾者卽須嚴密捕拏以
清亂源懷集等處難民遣散甚眾該撫擬立法編查妥爲綏戢著
卽照辦廣西自倡亂以來越時已十餘載今幸漸次蕩平該撫務
當通飭所屬招集流亡俾粵民各安耕鑿以期肅清轄境見在該
省何處有賊股數大小如何次第剿除之處並著張凱嵩詳查具
奏將此由五百里諭令知之○督辦河南團練大臣毛昶熙奏馳

抵汝甯勦辦皖捻得旨著卽嚴飭王文行等軍速將鮑進朝寨攻克一面調度各軍由談圩以次掃蕩將著名捻首悉數殲除皖捻及陳大澹等竄入桐柏交界尤須嚴飭尹嘉賓等兜截殲擒勿任一名漏網切不可徒託空言毫無實效○予山東傷亡遊擊焦其洲祭葬世職○戊子諭內閣雲南提督福陞前有旨疊諭飭赴昭通駐紮本日據駱秉章奏該提督見駐川省惟以索支養廉爲事詢以籌辦滇省事宜所言一無可採且遵旨催其前赴昭通而該員輒謂雖駐川省卽可作爲已赴昭通等語謬妄糊塗至於此極提督膺統兵重寄似此開葺無能之輩必致貽誤事機且該員以辦理軍務大員輒敢自便身圖意存欺飾尤屬可惡福陞著卽行革職以示懲儆○諭議政王軍機大臣等張之萬奏毫捻避兵遁入山內皖捻被勦竄往桐柏各一摺張總愚竄走皖南前經寄諭

僧格林沁飭令蘇克金馬隊與張之萬所部張曜各軍會合進剿
茲據張之萬奏稱該撫進軍汝州賊知官軍已由襄郟而前旋由
魯山退回南召縣境之李青店等處張曜等軍連日於板山坪追
擊獲勝葛承霖之軍亦進逼畱山堡與賊接仗各有斬擒惟李青
店向土岡等處在南召迤西山深徑窄非得步隊偏賊出險則騎
兵終無用武之地卽著張之萬嚴飭張曜葛承霖等軍各由西北
兩面併力夾擊偏賊東趨地勢較寬之處僧格林沁仍遵前旨飭
令蘇克金帶領馬隊豫備卽由魯山鈔進與張之萬所部諸軍會
合兜擊此賊前有仍圖西北竄擾秦疆之意其四棵樹地方路由
嵩縣直達河陝防剿尤關緊要張之萬見飭親軍由魯山進紮務
須實力辦理並飭葛承霖等湘楚各勇力爭李青店西北之險卽
可斬關奪隘與張曜等合力進逼使賊不得依山負固以老我師

至汝南一帶賊由尖山竄往桐柏與毛昶熙日前所奏略同其正陽土匪余瞎子等因皖捻遠颺其勢已孤輒敢向王文行等陷降王文行等嚴行拒絕卽將該匪寨乘機攻破勦撫兼施所辦尙好著張之萬卽飭王文行等軍將談家園賊寨乘勢進攻盡殲醜類並著毛昶熙嚴督黃貴誠尹嘉賓等將竄往桐柏之捻股密速勦辦迅殄遊氛毋令該匪等得以暇息再行滋蔓蒙亳等處善後有無就緒僧格林沁卽行馳奏將此由六百里各諭令知之○諭張集馨奏清查西同二府叛絕各產辦理大概情形據稱西同兩府回匪聚眾倡亂徧地蹂躪村鎮爲墟經多隆阿督兵勦洗將東路肅清所有各處叛產例應入官卽使偶有逆回逸出悔罪投誠亦斷無給還叛產之理且漢回仇隙已深若令叛回仍歸故土與漢民共井同村勢必復起干戈致令後患無窮等語所奏自係實在

情形惟該處逆匪未被剿滅者爲數尙恐不少將來官兵凱撤後或不免有陸續潛回舊土者若概不准其再入本境又恐貽患鄰封其應如何籌辦俾兩無窒礙之處著劉蓉張集馨妥爲經理所有西同兩府及邠乾兩州叛產統計約在萬頃以上此項地畝與其招佃認墾不如作爲屯田可以絕回民之覬覦而永遠相安兼可節省兵餉寓兵於農如能作爲旗兵之產尤屬合宜一切辦理章程均著劉蓉張集馨詳細妥籌奏明辦理其餘未經查出各叛產均著張集馨督飭委員速行清釐至西同鳳三府並乾邠兩州所屬被擾地方赤地千里漢民慘遭焚殺戶口完全者甚少其逃亡在外者固宜招集歸來令其認領舊產各安生業如果戶絕丁亡卽應將田產歸官張集馨務當揀派公正委員認真清查毋任官吏影射蒙混致滋流弊將此諭知劉蓉並傳諭張集馨知之○

諭滇省全局糜爛將來籌辦進剿機宜非借川省兵力無從措手

唐友耕在川帶兵向稱得力本日將其簡放雲南提督正以該員

近在川省可與駱秉章賈洪詔籌商進取之方爲後來規復雲南

地步著駱秉章於接奉此旨後卽傳知該員令其馳赴昭通駐紮

會商賈洪詔將滇省進兵事宜豫籌布置其昭通練頭李芝順見

在聚眾滋事並卽設法彈壓解散唐友耕舊隸駱秉章麾下該督

尤當飭令奮勉圖功以副委任一切剿辦機宜亦卽詳爲指示該

提督見在駐紮何處並著駱秉章迅速揀員接替以重防務將此

由五百里諭令知之○兵部尙書愛仁卒于祭葬諡清恪○以載

齡爲兵部尙書全慶爲左都御史調和潤爲工部右侍郎以寶珣

爲盛京戶部侍郎

由內閣學士遷

○以政績優異擢湖北知州牟嗣龍知

縣方大湜以知府用○庚寅諭各省督撫學政考察學官○于安

徽傷亡參將李開春等祭葬世職○辛卯諭議政王軍機大臣等
譚廷襄奏統籌黃河下游見行地勢擬請濬支渠以減漲水培土
埝以衛農田一摺據稱自咸豐五年河南蘭陽汛北岸潰決由直
隸之長垣東明開州至山東之濮州范縣壽張橫穿運河過張秋
鎮入大清河而直抵利津海口其閒經行之數十州縣被災輕重
不等大約張秋以上地勢平衍本無收束張秋以下循順歸槽又
苦於狹不能容旁溢爲害本年尤甚欲求下游之永奠必須開支
渠以減漲水查徒駭河尙寬深馬頰則大半淤淺必將此二河設
法疏濬再將各缺口逐一堵合並將河流刷及城垣之處築壩攔
護至張秋以上若能相地築隄束水自是一勞永逸之法惟工繁
費鉅力有不及應先將開濮兩州之金隄趕緊堵築其濮范與荷
澤比鄰之史家隄亦一併堵築並將舊有土埝加高培厚擇緊要

處設法接修而後逐漸布置等語所籌自係實在情形著劉長佑
閻敬銘按照該署河督所奏嚴飭該管道府督令各州縣趁此冬
春水小源微將可以施工之處趕緊勸令分投興辦以資保衛並
會同譚廷襄妥籌辦理不得遷延觀望致直東一帶居民日久不
能安業別生事端原摺著鈔給閱看將此各諭令知之○以重與
鹿鳴筵宴賞前太常寺卿原任工部尚書廖鴻荃太子少保前光
祿寺卿楊慶琛二品頂帶○壬辰會國藩奏恭奉諭旨鮑超全軍
見紮東壩此時溧水已復自應進圖句容以斷忠逆救援金陵之
路一節查溧水迤北爲句容迤東則爲溧陽該處去東壩較近實
僞侍王李侍賢之老巢十一月十二日侍逆糾黨五六萬眾分屯
梅渚距東壩建平各四十餘里十四日進犯建平守城將士一戰
卻之又轉趨周城社渚一帶於二十五日猛撲溧水守將王可陞

徹夜登陴力戰卻之近據諜報忠逆由金陵退出句容旋由句容潛入溧陽與侍逆合股意在分擾溧水建平奪我東壩一關並圖上竄東壩爲江皖浙三省關鍵鮑超正須以全力爭此要區暫不能進取句容以合金陵之圍自句容而外論者又謂宜急取廣德肅清全皖扼賊上犯之路臣以廣德易取而不易守鮑超旣力扼東壩更無他軍可當廣德一路句容廣德之不能早爭先著實由限於兵力難以兼顧又奉諭旨以李世忠擅殺壽州守門勇丁又於圍攻下蔡時因宋慶不肯讓給調隊攻打爭功啟釁令臣秉公查辦查陳國瑞與李世忠構釁彼此各執一詞據陳國瑞稟稱派副將康錦文帶同苗懌開於初一日攻克壽州初三日有李世忠營將領進城卽殺守門勇丁五名康錦文整隊迎敵立將李營隊伍逐出城外生擒五十餘名內有保提督蔣立功一名等語據李

世忠稟稱派提督朱元興等前往收復壽州不料被苗憬開將朱元興杜宜魁二員同時殺斃又派蔣立功前往收復正陽行過壽州被人誘入城內宋慶康錦文將蔣立功鎖押等語僧格林沁初次具奏李世忠所部擅殺守門勇丁其時但據陳國瑞之稟尙未接李世忠之稟厥後接到李世忠稟件知陳國瑞部下宋康二將有鎖押蔣立功之案其所帶之苗憬開又有殺斃朱元興杜宜魁之案情節尤重僧格林沁寄臣一函謂兩造各執一詞已咨唐訓方查辦唐訓方旋亦寄臣一函謂朱元興杜宜魁與宋慶康錦文先後同入壽城彼此互爭均有殺傷今李世忠咨稱朱杜死於苗憬開之手應卽殺苗憬開以議抵先了此案等語以臣愚見觀之苗憬開本係苗沛霖親屬死黨卽無殺朱杜二人應抵之案亦在萬不可赦之列宋慶雖稟訴蔣立功擅殺門卒然互爭之時殺傷

實亦相當又於李世忠部下之提鎮擊斃二人鎖押一人當不至更有餘怒李世忠不敢歸咎於宋慶等而指名係苗憬開所殺又恐其部下滋事急急帶隊回滁是尙無尋仇生釁之意此案由唐訓方悉心查明僧格林沁就近判斷自可處置妥善兩得其平至下蔡之役係李世忠部將何璜先入苗眾雖降而尙未獻寨逮宋慶康錦文挾苗憬開而來賊始舉寨以獻當時互相鬪殺在所不免何璜旋即退至龍王廟尙無始終爭執情事茲謹就臣所聞覆陳梗概其詳細情形應由僧格林沁唐訓方查明擬結又奉諭旨垂詢正陽收復之時道員蔣凝學何以有爭奪開礮致傷兵勇之事查正陽關城本係毛有銘會同康錦文程文炳於十一月初四日前往收復維時蔣凝學成大吉兩軍尙在顙上未知朱萬濬先已獻關投誠初六日移師至正陽隔河立營正擬搭造浮橋而關

上陸軍河下礮划已羣起轟擊蔣凝學等但知朱萬濬尙在城內以爲苗黨之出拒官軍也不得不開礮還擊蓋康錦文自壽州而往在正陽之東毛有銘自六安而往在正陽之西南蔣凝學自潁上而往在正陽之西北三者各不相謀當彼此互擊之時不特康錦文官兵在關城之內蔣凝學不得而知卽毛有銘湘軍在關城之旁蔣凝學亦不得而知也旋經毛有銘飛騎馳告彼此各自收隊究竟浮橋未成並無一人渡河蔣凝學所稟傷亡六十餘人康錦文所稟傷亡二十餘人臣竊以爲皆不可信頃據唐訓方來咨有親赴正陽細加訪察實因彼此未及知會並非有心尋釁等語揆厥情形尙屬可信唐訓方業經咨呈僧格林沁免其查辦又恭奉諭旨壽潁各城均已收復令將張得勝蔣凝學成大吉諸軍移緩就急分撥赴陝查湘營之在皖北者有四一日蔣凝學駐軍潁

州及三劉集進取潁上縣城者也一曰毛有銘駐軍老廟集會復正陽一關者也一曰周寬世駐軍六安州分防迎河集者也一曰成大吉駐軍三河尖與蔣凝學同進潁上者也此外又有石清吉一軍駐防廬州係多隆阿舊部亦歸臣處調遣臣以皖北首黨就滅羣圩悉平而忠逆又有上竄江西之議皖南別無大枝遊擊之師乃檄毛有銘所部移紮皖南並調周寬世回守省城換出安慶防兵令與毛有銘同赴南岸爲江皖交界遊擊之兵其成大吉一軍已准官文來咨調赴鄂省防剿三關一帶石清吉一軍亦赴鄂省防剿小河司一帶將來此二軍者或久畱湖北或漸入陝西應由官文酌度辦理臣所轄皖北之兵除調出四軍外僅畱蔣凝學數營分防潁州六安等處暫時未可輕動上諭議政王軍機大臣等會國藩奏接奉疊次諭旨覆陳一摺著卽照該督所擬妥籌

辦理惟蘇常一帶軍情正在得手賊勢趨重丹句金陵意圖奪圍上竄馮子材兵力苦單急盼鮑超之軍會攻句容而鮑超力扼東壩既不能與之會攻又不能分攻廣德止是相持局面日久終慮變生該大臣仍當於慎重之中力求出奇制勝之策方爲妥善陝甘逆燄甚張多隆阿亟須添調兵勇分投剿洗前據該將軍奏以淮北見就肅清懇將畱守廬州之石清吉梁美材所部七營調赴陝省助剿如江南兵勢稍紓並懇另撥數營馳往以厚兵力等語其需兵情形非常緊迫今據奏石清吉等營已由官文調赴鄂省著該大臣卽咨商官文先其所急酌度辦理諒該大臣等不至有畛域之見也摺片二件均著畱中所有李世忠蔣凝學啟釁各節應俟僧格林沁喬松年覆奏到時再降諭旨李世忠如不敢往見僧格林沁當仍遵前旨調至軍營諭令遣散部眾交還城池退出

釐卡停給餉鹽以期消患無形如招而不至或至而不從卽著僧
格林沁妥籌辦法不可遷就姑息一面迅速奏聞將此由五百里
密諭知之○廣江蘇江都縣學額六名河南開封府學額四名鄧
州一名太康縣三名○癸巳諭議政王軍機大臣等光祿寺少卿
鄭錫瀛奏請設屯田養兵以節經費一摺據稱各直省及東三省
等處駐防綠營滿漢兵丁七十一萬九千餘名歲需餉銀一千六
七百萬餘兩京城各旗營滿漢額兵十五萬一千餘名需餉五百
餘萬兩尚不在此數內國家歲入之款約計四千數百萬兩兵餉
一項已用其半請將被擾省分於城邑克復後查明業戶已絕荒
田圈爲官地募民屯種僉以爲兵並酌給駐防滿兵田畝令其收
取田租抵作兵餉計江浙皖陝甘等省兵餉每歲可節省數百萬
兩並請將俸薪等項及馬乾銀兩一併酌給荒田令其認墾招佃

抵作領款等語國家歲出各款以兵餉爲最鉅見在江皖蘇浙陝甘各省被擾較重各區戶口稀少多有無主閒田果能開設屯田所節兵餉爲數甚鉅於經費不無裨益著兩江閩浙陝甘各總督並江蘇安徽浙江陝西各巡撫各就地方情形分別酌擬章程妥議具奏並將業經克復地方先行辦理如實係無主荒田即可募民屯種並須選派廉明委員認真清查毋任蒙混騷擾至摺內所陳山東河南湖北湖南江西及川黔兩廣等省各屬被擾地方有無閒田可以開屯之處均著各該省督撫確切查明各就地方情形分別酌度辦理不得以勘始爲難藉詞推諉尤不可假手吏胥強奪民間有主之田致令紛紛擾害另片奏請飭將山東等省查出叛產給予兵丁屯田著山東陝西各巡撫妥爲經理並著皖豫黔粵各督撫將捻匪土匪各叛產一律查辦甘肅回匪叛產俟軍

務完竣後由該督查明辦理至臺灣營制向由內地營兵換班戍守將來地方肅清所有查出叛產應如何變通營制開設屯田之處著閩省督撫體察情形辦理原摺片各一件均著鈔給閱看將此各諭令知之○諭御史裘德俊奏直隸善後章程亟宜抽撥團丁訓練一摺團練之舉本屬有治人無治法行之不善則東豫皆其前鑒况抽練鄉兵若非賢明牧令恩威並用駕馭有方使權不下移而民無擾累則流弊更不可勝言設遇不肖州縣藉端苛索抽丁派費吏胥因緣爲奸上下咸思中飽小民已不聊生加以每縣聚集百餘人游手無著恃強凌弱擾害鄉閭甚或聚眾把持養成尾大不掉之勢一有亂萌響應尤易均不可不遠慮及之著劉長佑按照所奏各情細心酌覈就地方情形權其利弊是否可行如有窒礙之處亦卽據實奏聞朝廷於科道條陳原無成見惟在

該督爰爲斟酌辦理可也原摺著鈔給閱看將此諭令知之○諭
恩麟奏陝西髮逆回匪紛竄甘境請飭陶茂林馳赴秦州多隆阿
分兵援甘各摺片見在鳳翔回匪紛竄甘省鹽固匪徒分擾會甯
靖遠另股賊匪潛竄慶陽後路將環縣所屬之紅德城攻陷恩麟
請飭陶茂林就近飭赴秦州援應多隆阿分兵援剿並令四川援
兵趕緊赴甘之處自係爲軍情緊要起見惟陶茂林一軍先須將
陝省汧隴麟遊及甘省靈臺崇鎮等處各賊剿洗與雷正綰合取
平涼由固原鹽茶轉戰而北進取甯靈勢難徑赴秦州恩麟惟當
就見有兵力將會靖秦階各要隘分布並飭地方文武聯絡鄉團
嚴密防剿以顧東南兩路毋得專待援師致誤事機陝省南防興
漢北防甯夏東南之商南潼關亦須兼顧蓋屋踞匪尙未攻克勢
難再分大枝勁旅繞赴甘省西路爲兩面夾擊之舉惟陶茂林一

軍久駐麟遊日久尙未蒧事見在勦辦情形究竟若何著多隆阿
迅飭該提督將麟遊一帶賊匪趕緊掃除進攻平涼毋稍遲緩紅
德城踞賊卽著速飭曹克忠會同甘省之師力籌攻克以清慶陽
後路陝省防勦緊要多隆阿未能赴甘前經諭令雷正綰於到甘
後各營將士均歸該提督節制該提督務當統籌全局督飭諸軍
速將各路賊匪掃蕩毋許遷延觀望並著熙麟籌辦糧臺供支軍
火毋令缺乏甯夏漢城失守已疊據慶昫熙麟奏報恩麟所稱漢
團王添德率眾燒殺回莊未必卽係侯雲登所遣恐回匪藉詞滋
事亦未可定該匪業已距城戕官斷難再行議撫前已諭令訥欽
帶直隸官兵二千由朔平歸綏相機進發以爲甯夏援師並由山
東調撥楚勇赴陝由多隆阿酌量派赴定邊以資防勦劉蓉入陝
後如漢南軍務迅卽蕩平可以分顧甘省卽由熙麟恩麟與該撫

籌商調撥可也將此由六百里諭知多隆阿熙麟雷正綰並諭恩麟知之○諭總理各國事務衙門奏詳陳辦理俄國分界委曲情形一摺據稱常清等疊次奏報俄國闖卡撲營餉缺難支明誼所奏亦以常清所稱餉缺難支均係實情如俄國遣使復來當與明緒等酌其輕重勉圖收束此次奏報則稱西界事宜已由總理各國事務衙門准照議單辦理並稱伊犁已獲勝仗似易轉圜與前此兩害相形酌其輕重等詞不符等語夷務之壞皆因從前內外臣工互相推諉近來時局艱難中外臣工豈可再蹈故轍若各存諉卸且於奏陳摺內隱約其詞豫爲卸責地步設因此延閣別生枝節致成決裂益難收拾且地隔數千里或萬里之遙亦難悉由都中懸揣卽將來烏梁海等眾哈薩克布魯特等部作何撫慰安置亦須由該將軍等躬親其事之時就近酌度情形辦理伊犁偶

獲小勝未必可恃著明誼等於會議時卽就當時情形徑行酌辦不得遊移瞻顧動輒咨商總理衙門以致貽誤事機原摺著鈔給閱看將此由五百里各諭令知之○甲午 上復詣 大高殿祈雪○李鴻章奏臣前令劉秉璋偪取嘉善程學啟由平望進紮楊鼎勳一軍先在干窯洪家灘等處堵截嘉善往來之路嘉善逆首陳占榜余嘉鼇詣道員吳毓芬營中乞降獻城並求派兵前往吳毓芬察其意甚誠赴蘇稟商臣令會同程啟學劉秉璋楊鼎勳等妥爲辦理十一月二十七日先飭該酋等將城外營盤撤退劉秉璋楊鼎勳各帶小隊前往分列東西兩門吳毓芬隊入自南門督令圍城降眾薙髮二十八日程學啟劉秉璋楊鼎勳等入城陳占榜余嘉鼇率眾跪迎城內肅靜無聲市廛未改程學啟等宣諭聖朝寬大之德降眾羅拜感激遂將嘉善縣城收復降人老弱約

近二萬陸續遣散暫准挑選千人編立兩營仍令自備口糧協同
官軍守禦臣查我軍收復平乍海鹽後惟嘉善一城尙爲嘉興東
面之蔽是以分飭各軍先圖此地見經該降酋等率眾投誠計嘉
興東北兩面均已肅清潘鼎新之軍又克沈蕩新豐賊壘當飭各
軍會合進攻降酋陳占榜余嘉鼇悔罪獻城恪遵約束可否仰懇
天恩准將陳占榜賞給遊擊銜余嘉鼇賞給都司銜以示激勸
又奏嘉興踞逆分撲海鹽平湖在沈蕩新豐兩鎮紮壘自海鹽守
兵擊敗蔡逆後僞王宗陳炳桂僞蔣王陶金會僞天將錢得勝等
併踞沈蕩與瓊城之軍連日接仗十一月二十四日悉眾來撲唐
宏成督熊建勳等分投夾擊賊始披靡陣斬四五百名生擒百餘
名乘勝追剿該逆敗回嘉興當將沈蕩鎮賊營六座盡行踏毀新
豐鎮離平湖城十里爲嘉興至平湖要道二十五日潘鼎新由乍

浦帶隊往剿賊跨河爲營平列三座堵斷橋門阻我礮船二十六日潘鼎新令潘國揚等直攻中路石壘丁壽昌等繞後襲其北潘鼎立等迎頭衝其南賊扼險死拒潘國揚等以開花礮轟塌營牆數丈丁壽昌等由上塘新篁里鈔出排槍環擊北面之賊先潰潘鼎立等自竹林廟一帶鈔攻逾時南面賊亦不支與石壘之賊紛紛皆潰我軍拔椿踰濠砍殺數十名餘眾奪路狂奔追至十八里橋落水死者無算新豐鎮賊營一律毀平臣查嘉興竄逆前此已屢受懲創見經收復嘉善其勢益孤仍飭潘鼎新等相機攻取又奏常州東北門外賊營數十座均經官軍攻塌惟南門口德安橋尙有賊土營石卡十一月二十八日李鶴章督飭郭松林周盛波等三面進攻用炸礮轟塌營牆郭松林率奮勇數十人乘煙擁進擒斬悍賊二百餘名李鶴章卽派隊填紮又附城河趕築一營以

便架礮轟城護逆忽帶城賊數萬由西門鈔出我後周盛波等奮力兜剿賊大挫退擒斬六七百名護逆被圍緊急求救於丹陽僞然王漳王等糾黨分撲孟河石橋灣羅墅灣各降眾營壘陸續攻破惟奔牛二營係降酋邵志倫與劉銘傳派去營官黃桂蘭唐殿魁督勇力守該逆於奔牛四面築營十餘座夾河搭橋周圍聯絡又由溧陽調同小火輪船開放炸礮營內更樓石牆房屋多被轟倒勢甚危急十二月初三日劉銘傳李鶴章商抽攻城隊伍二千人由湯莊橋突圍猛衝距奔牛八里賊出大隊迎拒我軍且戰且進忽兩邊村樹中伏賊齊出包鈔後路我軍小挫而奔牛守將日有帛書乞援子藥將罄久必難支劉銘傳密派幹弁於初五夜輕齎洋藥捲四萬送入奔牛營中諭令唐殿魁等堅守五日以待援師初七日劉銘傳親帶三營郭松林挑派三營槍隊滾紮而前自

奔牛至常州西門二十里內賊營碁布無懈可擊劉銘傳等偏師直擣倚營自固李鶴章又添派副將曹仁美參將周蘭亭董鳳高帶兩營槍隊繼進以備策應頃據劉銘傳李鶴章馳報初九日十偽王之眾圍撲董鳳高之前營另股萬餘人鈔襲我後劉銘傳郭松林分投迎剿自辰至未鏖戰大破之殲斃生擒六七千人追逐十餘里薄暮乃止有此奇捷當可卽解重圍常城踞賊因我軍分隊遠剿日出撲營初五六日張桂芳駱國忠敗賊於北門初八夜周盛波敗賊於南門遂不敢出查踞守常州偽護王陳坤書係粵西老賊部眾十餘萬其籍隸三江者多已投降惟楚粵悍黨相約死守又恃丹陽金壇句容宜興各股就近援應是以屢戰屢挫而其氣不衰此次漳然各逆欲攻奔牛直鈔劉銘傳西北門各營之後深入腹地圖解常圍臣初聞援賊甚眾慮我攻城各營受其牽

掣浙西軍情少舒已檄調總兵楊鼎勳六營由嘉善拔赴常州協力援剿又添總兵況文榜兩營由太倉拔赴江陰常州交界以保劉銘傳後路又派程學啟親帶小隊馳赴常州察看賊情以備兩邊策應詎援軍未至而劉銘傳郭松林等已酣戰破賊此後兵力愈增或可漸次得手 上諭議政王軍機大臣等江蘇官軍自連復平乍海鹽惟嘉善一城向爲嘉興東面之蔽此次該降酋率眾投誠藩籬盡撤自應乘勝進規嘉興以掣杭湖各賊之勢卽著李鴻章督飭潘鼎新劉秉璋等相機攻取毋稍疏虞左宗棠近日久無奏報不知有何布置見在滬軍與浙軍聲息漸通如須與浙軍會合攻剿之處著該撫卽行飛催並將浙省軍情迅速具奏常州踞逆陳坤書見又糾合漳然各逆圍攻奔牛營盤圖鈔劉銘傳各營之後雖經官軍分投迎剿大獲奇捷而奔牛之圍未解賊援亦

未全退亟宜悉破羣賊以期漸次得手李鴻章已調楊鼎勳六營
况文榜兩營赴常協助防剿並派程學啟馳往策應所籌均屬周
密卽著督率各軍迅解重圍攻克常郡不可稍涉大意另摺奏減
成酌徵冬漕統共起運白正耗等米十二萬二百餘石隨給沙船
耗米九千八百三十餘石飭令一律收齊仍議由海運津以資便
捷等語李鴻章於新復地方卽能酌量情形籌畫天庾正供具見
辦事認真深堪嘉尚又片奏松太等屬減價折徵酌定每石收足
制錢六千四百五十文一切公用均在其內由官買米起運等語
均照所請妥速辦理將此由六百里諭令知之○乙未 上御撫
辰殿大幄次賜蒙古王公等宴並賞賚有差每歲皆如之○諭議
政王軍機大臣等馮子材等奏鎮防近日軍情暨揚營兵勇來鎮
駐紮日期各摺片南路各股悍賊遁回丹句各巢負嵎不出馮子

材等見飭張文德等將前敵各營深溝高壘以防衝突自可穩固無虞至圍攻奔牛營盤之賊昨據李鴻章奏官軍奮力迎擊已獲大捷重圍指日可解惟該逆一經敗潰勢必鋌而走險紛竄旁趨鎮城尤當其衝馮子材惟當督同內外將弁隨時戒嚴相機進取不得稍涉大意揚防派出之遊擊鄭啟貴等見已屯紮丹徒鎮一帶並著飭令實力扼紮毋稍疏虞田宗揚見丁母憂懇請回籍守制情詞肫摯自未便強令居官著准其開缺惟田宗揚久歷戎行在鎮防諸將中頗稱得力見當防務喫緊之際應否暫畱軍營以資熟手之處著馮子材等斟酌辦理將此由五百里諭令知之○丙申諭內閣賈洪詔奏提督意不在公難期得力等語據稱雲南提督福陞向駱秉章指陳滇省軍務毫無實際復欲索銀鉅萬交伊進剿又欲爲其子指捐四川官階以欠伊養廉作抵其子郭拉

豐阿品素不端於賈洪詔委申有謀幫辦昭通事務輒欲派其子同往並欲與賈洪詔會銜咨催張亮基欠餉種種謬妄營私實出情理之外福陞前經賈秉章奏參降旨革職著與其子郭拉豐阿一併勒令回旗母任在川逗遛○左宗棠奏杭州餘杭兩處賊匪經官軍疊次痛剿後復於餘杭東門至杭州之倉前長橋女兒橋等處糾添悍黨欲由何母橋繞截餘杭各軍後路均經官軍擊退蔣益澧派副將周廷瑞等於天水橋太平橋等處添築營壘十月十八日長橋女兒橋之賊來犯復經官軍擊走其杭城踞逆亦於十八日由萬松嶺直撲我軍營盤都司張志功等憑濠堅守高連陞等督隊馳擊賊勢稍卻時劉連陞等三板師船將沿河之賊擊退登岸衝殺該逆分股迎拒酣戰兩時賊匪大敗殲斃數百名共由清波門所出之賊被王月亮督軍截殺潰退回城康國器一軍

於十一月初五初七等日攻擊餘杭東門埭賊壘亦壘有斬擒臣
馳抵富陽後於初十日馳赴餘杭察看形勢當調駐紮富陽之朱
明亮等五營駐紮分水之張聲恆等四營齊至餘杭會剿一面飭
副將劉明珍率駐嚴州兩營淳安兩營填紮分水由皖調回之黃
少春一軍亦檄其由分水新城以出餘杭進扼西北一路十七日
令魏喻義等列隊南門康國器列隊東門以制賊勢羅大春楊昌
濬等由丁橋分路繞出西北隅城賊壘賊及東北門外之賊悉眾
來撲官軍分投接仗鏖戰逾時殺悍賊百餘名生擒黃衣賊目十
餘名該逆敗回追近城邊賊爲水阻各軍偏之戮斃溺斃無算二
十四日令張聲恆等進紮餘城西北隅蔣益澧黃少春楊昌濬等
各率馬步繞出西北一帶官軍排列甫定該逆悍黨萬餘由北路
前來拒戰西門之賊亦皆出隊負城壘而陣黃少春從左路先進

擊斃先鋒悍賊數十名蔣益澧楊昌濬各率所部衝入賊陣賊分數十支拌死抗拒官軍三面蹙之節節偏壓而進賊敗至城北沿途屍骸枕藉僞王鄧沆明僞朝將汪海洋猶揮其死黨苦相格鬪蔣益澧策馬陷陣各軍乘之首逆鄧沆明被擡礮轟穿左脅立斃陣前自辰至酉斬大小賊目百數十名悍賊五百餘名其東路康國器一軍攻破柯埭賊卡乘勝進攻牛畈太平橋賊壘斬馘亦多賊敗後兇燄頓衰於餘城西北門外連夜濬濠築壘官軍日夜搦戰賊鼠伏不出臣與蔣益澧楊昌濬黃少春等商議由北路築壘分軍襲取瓶窯絕其糧路臣暫回富陽大營清理積牘擬卽拔營進駐東西兩路適中之橫溪頭以便督勦蔣益澧暫回畱下鎮老營布置杭州一路戰守登山遙瞰各路援賊趨重杭州西北餘杭東北一帶凡自賊中逃出者均言鄧逆投首羣賊洵懼十二月初

一日蔣益澧親督馬步各營列隊錢塘門外秦亭山棲霞嶺一帶牽制城賊令提督高連陞洋將德克碑等會同水陸各營徑攻鳳山門外各壘該逆揚旗而出高連陞德克碑等大呼陷陣賊勢披靡退入壘中官軍躡蹤追入破其一壘乘勝分攻各壘羣賊望風逃竄自辰至午共破九壘追賊直抵城隍山腳劉連陞等師船排礮轟擊江邊石壘亦破之計共斃賊二千有奇見在杭州城外祇餘古塘賊壘及近城兩壘未破蔣益澧卽令高連陞分所部五營駐賊五壘德克碑所部駐賊二壘偏之臣維杭州形勢所恃爲屏蔽者餘杭一城悍酋鄧沆明汪海洋拌死爭之今鄧沆明業已伏誅而杭州城外各壘掃除幾盡餘杭之賊自不能不回顧杭城老巢旦夕必有可乘之機如兩城有一先下則浙西三郡大局可以漸定蔣益澧擬卽移紮饅頭山雷峰塔秦亭山並調橫溪頭各營

力攻古塘堅壘臣面飭楊昌濬如探知餘杭賊勢變動卽相機截之令其首尾不能相顧復檄劉培元統各營水師下勦以扼錢江之險而助陸路聲威臣拜摺後卽拔營進駐餘杭之橫溪頭以便相機督勦上諭議政王軍機大臣等見在杭州之賊聞風洶懼餘杭賊勢亦將回顧杭城老巢均有可乘之機左宗棠所籌均極周密卽著督飭各軍乘勝進取力圖恢復兩城以紓股盼昨據李鴻章奏滬軍收復嘉善縣城已諭令進規嘉興以掣杭湖各賊之勢左宗棠前奏亦已分兵進規湖州杭賊向賴嘉湖援賊接濟糧運此時各軍同時並舉該逆實有兼顧不遑之勢如杭餘兩城一處得手則浙西三郡可期功收破竹漸次底定卽著該督妥爲籌策用副馳驅洋將德克碑此次會攻杭城賊壘甚爲出力著左宗棠仍飭令勉籌會勦迅奏膚功署浙江臬司劉典丁憂懇請回籍

治喪已由左宗棠飭令啟程惟見在浙西軍務攻剿正形喫緊該
臬司帶兵甚爲得力著左宗棠飭令趕緊料理一俟治喪事竣卽
行赴浙剿賊以副委任杭嘉湖三屬向徵漕糧浮收過重該督擬
俟地方收復後再行分別議減浙東地丁積弊亦甚均應查明辦
理見在温州尙稱完善該督已督飭該管道府將一切陋規裁革
除正額照常徵解外其餘浮費減去錢四萬五百餘千米三百餘
石足見體恤民瘼實心任事其浙東各屬並著一律辦理將來嘉
杭湖克復後卽著該督慎選賢明守令剔除積弊將徵數安立章
程分別議減期於永遠遵守以副朝廷軫念窮黎之意將此由六
百里諭令知之○諭徐宗幹奏克復彰化縣城曾玉明丁曰健奏
會師克復彰化並攻克要隘情形各一摺臺灣逆匪日久蔓延從
未大受懲創經丁曰健攻拔鼓頭與曾玉明會師進克彰化並將

鹿港至寶斗一帶道路疏通其南路匪莊亦經吳鴻源曾元福先後攻克多處林文察見已放洋收泊臺灣著左宗棠徐宗幹卽知照該署提督迅卽馳赴嘉義會同曾元福相機進攻速清餘孽斗六逆巢已經官軍圍困著曾玉明丁曰健激勵諸軍迅將賊首戴萬生斬擒毋令免脫內山貓霧巡檢地方業經攻克著卽飭令林文明等軍合剿四塊厝林逆老巢以期山內地方一律肅清將此由六百里諭知左宗棠徐宗幹並傳諭曾玉明丁曰健知之○劉蓉奏漢南自援軍挫退賊勢蔓延據探報僞端王藍城春僞扶王陳得才僞遵王賴汶洸等分踞漢郡城固兩城僞啟王梁城富貴踞新集黃官嶺一帶僞天將馬士榮范大頭等分竄西鄉前踞襄城之易矮子分竄畱壩等處藍湖村仍踞洋縣分股竄陷佛坪張第才自鎮安陷山陽李雲麟前軍小挫見督各軍剿辦計可得手

臣自抵巴後檄飭漢南州縣督率團練扼要堵截先後擒斬長髮老賊多名川省各軍分駐青石關梅子壩一帶疊將賊匪擊退青石關一帶地勢高峻十月以後冰霰堅凝米糧不能轉運不得已退紮川陝交界之西河口大壩等處以就糧運該逆見我軍不戰而退莫測所爲亦遂退駐新集油坊街老巢於是黃官嶺法慈院等處均無賊蹤查該逆自踞漢郡以後其餒益張其黨愈盛約計二十餘萬人密布分屯綿亘二百餘里然眾雖多而不整諸酋爭相雄長急則相救緩則相圖故其勢尙非難破之賊以臣度量儻得精兵三萬人籌備半年之餉必能殲茲醜類今駐巴已逾兩月未敢遽爾前進者實緣兵力尙單餉糈無出不得不持重以待之從前川省各軍除裁撤外僅存九千餘人湘果兩軍自挫敗後銳氣大傷驟難復振果後九營四千餘人近始陸續到巴合臣所募

親兵各營統計一萬六七千人以之共當一路則聲勢頗壯而以分作兩路則尙嫌單臣見擬親率所部及果後九營進紮甯羌徐規勦辦以取建瓴之勢頃聞南岸之賊忽竄出漆樹壩鐵鎖關距甯羌僅數十里已檄飭參將劉鶴齡等先率所部進紮黎坪臣亦卽督率各軍由廣元進發一切進止機宜容俟到甯羌後規畫陳奏至於悉師大舉必須三路進兵查太平城口一帶經駱秉章派令唐友耕等添兵防守計臘底可到李雲麟會勦山陽後春初可由興安進趨石泉臣擬咨商駱秉章卽令唐友耕等四千餘人與李雲麟所部五千餘眾會趨西鄉以圖洋縣是爲東路進勦之師新調四川藩司江忠濬帶有楚勇二千間正月可到並擬咨商駱秉章飭令徑赴南通會同何勝必等軍由青石關徑擣漢中是爲南路進勦之師至臣所調唐星照會傳道兩軍見經催令迅速整

齊前赴臣營卽由甯羌進規襄沔是爲西路進剿之師此三路總
於來春正二月先後取齊三月以內可期大舉臣總當與駱秉章
統籌熟商力圖剿辦 上諭劉蓉所奏各路賊匪分竄情形尙爲
明晰漢南一帶州縣派團防剿等情與多隆阿張集馨疊次所奏
大致相同卽著劉蓉速由廣元進發到甯羌後籌定一切進止機
宜速行具奏所擬唐友耕等軍與李雲麟會赴西鄉以圖洋縣爲
東路之師江忠濟楚省到來會同何勝必蕭慶高朱桂秋各軍由
青石關徑擣漢中爲南路之師而該撫催調唐星照會傳道兩軍
率由甯羌規取襄沔自西路進仍符原議三路進兵之策均著照
擬迅速辦理惟進兵須至三月則此兩月未能進兵之前仍當督
飭各軍穩守養成精銳及時而動本日亦經寄諭駱秉章速飭唐
友耕等各軍到防與劉蓉熟籌相機進取惲世臨嚴催唐星照趕

緊募軍赴陝唐友耕等軍尙未募齊驟難出境會師李雲麟未可孤軍深入著卽暫駐石泉茶鎮扼賊竄路一俟諸軍取齊卽當約期並進李雲麟與劉蓉相距較遠所有東路軍情卽准其暫由李雲麟單銜奏報其酌擬陝省清查叛產籌辦營田諸務卽著劉蓉按照所奏與張集馨詳悉妥籌實力舉辦楊寶臣業已簡授河東道河東鹽務緊要該撫請將該員發往陝西差委之處著毋庸議李宗沆劉餘慶二員皆在陝西本籍卽著劉蓉傳旨飭令會同地方官將清查叛產籌辦營田各事宜妥爲興辦黃輔辰一員著卽存記以備簡任該員見在成都著劉蓉卽調至軍營以資臂指其陝安道何丙勳升用知府張獻三二員旣據該撫奏稱均爲可用之才著卽飭令何丙勳督同張獻三華馳赴興商一帶將釐捐兩項妥爲籌辦隨時撥解李雲麟所部隴軍澄漢等營月餉之需李雲

麟於一切進止仍應與劉蓉熟商實力辦理毋稍貽誤將此由六百里各諭令知之○諭劉蓉奏遵旨籌辦並酌定援軍餉額分任責成以符三省會勦原議一摺漢南軍務屢經諭令秦楚蜀三省妥籌會勦所需軍餉自應由三省分籌據劉蓉奏稱前經詳定川省所派川軍由川撥餉李雲麟所部各軍卽由鄂省接濟漢南一軍由陝省供支官文等於李雲麟建毅六營梁作楫凱字五營月需餉銀均屬竭力籌濟川軍新挫之後亦經劉蓉函商賂秉章允將援陝諸軍月餉八萬有奇按時撥解是川鄂諸軍均係自裹行糧惟李桓所募之義勝軍月餉虛懸罔著梁作楫所部凱字五營旣經鄂省調回則義勝軍月餉卽應由鄂省籌濟餉需以符定議至李雲麟新募之隴軍各營及澄漢水師口糧軍火鄂省力難兼顧見已由劉蓉飭令道員何丙勳等於興商一帶辦理釐捐隨時

撥解劉蓉見在進紮甯羌力圖進克興漢所募親兵及添設牌礮營頭以爲破賊之用所謂副將唐星照由湘募勇四五千名亦於臘底春初可以到營所需軍火口糧尤應寬爲籌備以資飽騰方不至有停兵待餉之虞著官文駱秉章嚴樹森各按所定月餉六萬八萬之數隨時撥濟勿使稍形缺乏並著張集馨督率藩司迅速籌款每月撥銀二萬兩解赴劉蓉軍營毋稍延玩前諭張集馨以陝省叛絕各產招民認墾不如興辦屯田茲據劉蓉所奏各情與前諭旨正相符合劉蓉所保之李宗沆劉餘慶二員已諭令劉蓉傳知該員等專司襄辦著張集馨卽揀派司道得力大員總司其事會同確實查明分別村莊畝數酌定章程與劉蓉會商詳悉妥籌實力舉辦劉蓉遵查漢中城固失守殉難各員業經降旨均照所請分別懲卹惟其中盧又熊一員開城出走縱勇肆掠情尤

可惡漢中失陷之後盧又熊行至漢岸無船可渡其黨四散該員亦不知實在下落諒必潛逃各處著官文駱秉章嚴樹森張集馨於湖北四川陝西各省一體嚴拏務獲就地正法以爲炯戒劉蓉見已進紮甯羌籌畫進兵將來川省援軍分西南兩路進剿則東路更形喫重卽著官文嚴樹森於該省各營抽調一軍仍駐興安以防賊竄回鄂之路並與李雲麟之軍聯絡策應防剿兼施其與豫省毗連沿邊各處仍須嚴密布置毋稍疏虞駱秉章於陝南軍務素能竭力兼顧並著速飭屬友耕唐大有等軍迅卽到防與李雲麟所部會合進取西鄉一路以圖洋縣與劉蓉進規褒沔之師相爲策應迅奏膚功將此由六百里諭知官文駱秉章嚴樹森並傳諭張集馨知之○諭毛鴻賓郭嵩燾奏各屬土客構禍日深見在辦理情形瀝陳廣東隱患籌修礮臺各摺片肇慶各屬土客仇

殺日深又有土匪李四各股攪雜其中陽江蔣朝剛一軍陽春侯
勉忠一軍兵力單薄僅能自守卓興所部見可啟程前赴陽春相
機布置並委知府史樸等調處肇慶土民事宜開平恩平客民就
便察看太湖山曹冲等處隨地安插卽著照毛鴻賓郭嵩燾所擬
督飭派出各員弁酌度情形或痛加勦洗而使之知畏或加意撫
循而使之知感分別妥爲辦理該督撫惟有持平酌覈分良莠不
分土客勸懲一秉大公庶覺端日弭兩造漸可相安廣東隱患日
積盜風肆起州縣自顧考成大率諱盜爲竊改重爲輕以致伏莽
倍甚從前各屬降匪及各路截汰遣回之勇丁日聚日多金陵蘇
杭逆黨亦多有逃回者肇慶土客游蕩無歸肆行劫掠禍患所伏
誠不可不豫爲之防該督撫籌辦情形均中竅要除暴安良諸要
務首在州縣得人則地方方能漸臻安謐毛鴻賓郭嵩燾務當慎

選賢能牧令擇人而任爲斯民培養元氣以杜亂萌而除民害方爲妥善所籌擇要修築礮臺請將虎門殘廢礮臺基石移修內河礮臺之處著卽照毛鴻賓等所擬妥爲辦理其省河西礮臺等處及東西岸內港各礮臺是否均屬扼要應行存留並著分別查勘酌辦將此由六百里諭令知之○諭賈洪詔奏見辦滇省軍務情形豫籌餉需並部選人員請以到營日期作爲到省暨請調員差委各摺片滇省兵餉全賴四川籌濟見在陝南軍務未平勢難分撥並昭東二屬亦有回黨分布賈洪詔與駱秉章會商先行揀員更換昭通鎮府與民團聯絡防守俟川省能接濟兵餉卽親赴昭通督辦所籌尙係實在情形惟東昭與川省毗連爲入滇緊要門戶見已有回黨窺伺尤應加意嚴防賈洪詔見因兵力不敷暫駐川省卽著與駱秉章會籌遴派得力之員迅赴昭通籌辦防剿仍

著賈洪詔隨時詳察如所奏鎮府各員到任後兵民聯絡足資防守此後或可乘機進取仍須大員前往督辦賈洪詔惟當審度時勢熟籌進止毋得稍存畏憚之見遷延歲月坐失機宜所稱東川營參將楊盛宗辦事可往其父楊玉衡深知機宜並臨安之梁士美田仲興等不肯附匪業經該撫密札獎勵卽著賈洪詔飭令楊盛宗等與臨安十一土司激勵兵練互爲聲援滇省需餉孔急賈洪詔飭蕭浚蘭將未用實官照委員勸辦減成收捐並令張兆辰將未變鉛斤派員領赴川湖銷售各節均著照所議辦理蕭浚蘭簡授滇藩時逾三年延不赴任前經吏部奏參降旨革職茲據賈洪詔奏稱係因滇省回踞未能前進請將該員與林鴻年留營襄辦均照所請留營差委至部選路南州知州文鴻盛前經部議以到任逾限革職賈洪詔見委該員署大關廳同知與定例不符著

另行遴員接署文鴻盛如才尙可用卽准其暫行畱營一併差委以觀後效其所陳滇中見爲回踞該員等未敢輕入尙存自愛之見與尋常規避有異亦係實情嗣後該省部選分發各員卽著照賈洪詔所請以到該撫行營之日作爲到滇日期蕭浚蘭文鴻盛二員見准畱營如能奮勉從事著有績仍可奏請錄用也另片奏差委需員請調尹善廷等赴營業經降旨照准惟尹善廷一員前在皖省軍營辦理苗逆事宜諸多未善該員到營後著賈洪詔隨時察看如不得力卽行奏明撤回本日復據御史張澐卿奏訪聞總兵馬如龍於回眾之中實屬稍知大義見有大舉規復迤西之議請飭川省選派勁兵交勞崇光督率相機進取以壯聲援等語馬如龍與杜逆構釁是否激於義憤抑係專欲遂其吞併之謀殊屬未可深恃著駱秉章勞崇光賈洪詔確切查明如馬如龍誠

心效順或可用爲前驅之處惟在該督撫等妥商會辦張澧卿原摺著鈔給閱看將此由六百里各諭令知之○諭已革安徽巡撫翁同書加恩遣戍新疆○予浙江陣亡副將扈照乾在籍殉難員外郎謝敬陝西陣亡遊擊陳天柱等祭葬世職○丁酉諭議政王軍機大臣等開敬銘奏查辦逆產遷移災民情形請將沿河州縣管轄地方仍循舊制一摺鄒縣白蓮池逆產經該撫派員查出一百五十三頃七十餘畝堂邑之甘官屯劉貫莊附近逆產二十六頃八十餘畝又堂邑莘冠館朝各縣逆產六十二頃十畝零房屋九百九十五間觀城縣逆產十畝臨清州逆產三頃九畝零據該撫聲稱曹單等處强悍貧民未便移諸兗州荒亂之地等語所奏不爲無見其黃河以南東阿平陰等處及河北災民均因安土重遷不願分投遷徙自係實在情形著卽照所議停止其鄒曲四縣

費五縣未經認領荒田三百三十二頃餘畝著卽照該縣所詳以一年爲限如果係逃亡之戶地有原主於限內回籍認領者卽仍給予耕種逾限未領然後入官惟地方胥吏於清查叛絕各產時則侵吞入已於逃戶歸籍認領原產時則多方需索或虛捏逃戶姓名倩人代領據爲利藪或地方奸民任意侵冒各種情弊皆所不免閭閻敬銘務當嚴飭各該地方官認真經理不得任聽書吏奸民叢滋弊竇致令利歸中飽其沂郡所屬土匪及淄川土匪叛產亦著閭閻敬銘實力清查毋任隱漏前據光祿寺少卿鄭錫瀛請查明無主荒地屯田養兵請清查叛產辦理屯田各摺片當經諭令各該省督撫酌量辦理昨據劉昉奏稱陝省逆回叛產不下數百萬畝擬於清查後籌辦營田以資軍餉並將叛產絕產分別詳查妥籌舉辦等語見在東省白蓮池及堂邑等處叛產並兗郡荒田

絕產是否可以辦理屯田之處著該撫因地制宜熟籌妥辦總期於國計民生兩有裨益至僧格林沁所奏黃河南北各州縣所轄地方請以河爲分界之處旣據閭敬銘查明事多窒礙著卽仍循舊制以歸簡易該撫仍當督飭沿河各州縣於隔河所轄地方隨時巡查撫綏毋稍疏忽將此由六百里諭令知之○諭雷正綰等奏官軍攻克當原等賊巢立解鎮原城圍並陶茂林見已到汧亟籌進剿各摺片熙麟奏遵查甘省近日軍情一摺雷正綰之軍攻克王村花所鎮賊巢後涇境已無賊蹤而鎮原境內之當原北原地當衝要爲賊所踞經雷正綰親督各軍進剿直薄賊壘誘賊離巢總兵成祿魏添應等伏兵齊起奮力勦擊當將兩原賊巢掃蕩進紮鎮原附城一帶搜剿立解城圍餘賊敗向平涼遁去雷正綰以乘此聲威自應直進平涼而陝之汧隴甘之靈崇等處賊巢聯

絡不惟涇州空虛卽慶陽亦無屏蔽且恐賊得回竄邠長繞至官軍後路必得陶茂林一軍速由鳳翔前進會同剿除秦隴兩省毗境賊氛方可合力以圖進取與熙麟所奏請飭多隆阿迅催陶茂林等所部與雷正綰合籌進剿之意正同陶茂林見在已將鳳回收撫帶領各營到汧進剿卽著雷正綰督率各軍速與陶茂林前後夾擊將汧隴及靈臺崇信之賊痛加剿洗以清後路該提督等卽當合兵一路直取平涼以成破竹之勢甯靈相距道路雖較遠第使官兵迅克平涼由鹽固轉戰而前自足以褫奸回之魄各地方望援孔亟亦必聞風響應逆回馬化澂分股攻撲中衛地方係與蘭州等處接壤熙麟務須飭令甘省文武多派兵勇嚴扼中衛並激勵各屬官民悉力備禦嚴防奸宄窺覲保全河西三郡毋致爲賊所乘致剿辦更形棘手張集馨於白集原遺糧撥出二萬石

解涇接濟軍食此時自己運到甘省民力彫殘餉需萬難籌畫陝省自潼關以至長武東西大路業已肅清商賈定漸復業其未遭兵燹各屬亦應尙有積糧雷正綰等軍進剿正當喫緊慶陽亦缺乏堪虞仍著張集馨竭力妥籌源源接濟鳳翔回民雖經陶茂林收撫其善後事宜並著張集馨督飭該地方官妥慎籌辦務令各回民革面洗心各安生業毋致再生事端前所調派晉省撥赴定邊一軍嗣由山東改撥單縣所紮楚勇一千名卽由東省取道汴省徑赴潼關此時當可到防訥欽所帶直隸一軍亦將可達歸綏以圖進取雷正綰務當乘此迅速合軍鼓勇直前以拯隴急而紓西顧熙麟密摺一件另封原稟二件均畱中備覽將此由六百里諭知熙麟雷正綰並傳諭張集馨知之○以直隸官軍捻斬首逆張玉懷等出力人員加銜升敘開復有差○子安徽傷亡參將張

東臯祭葬世職○己亥僧格林沁國瑞奏臣等前派翼長蘇克金帶領馬隊會合豫軍剿辦張總愚股匪接據蘇克金稟報十二月初四日行抵魯山查探該逆盤踞李青店地方該處在亂山之中崎嶇小路馬隊難以進攻其張曜之軍見駐板山坪地方係在城之西南儻能誘賊東竄馬隊方可得手等情臣等查馬隊非平原不能施展該逆倚山負嶠自應誘其出山方能痛剿當經飛咨張之萬嚴飭張曜督隊前進並令各路步隊實力進剿總期由西北偏賊東趨俟其竄至南召一帶地勢稍闊庶馬隊得以兜擊至潁州一帶圩寨前派副都統恆齡等前往清查拏獲逆黨冉廣詩王際組訊明正法並有潁州紳練程鳳三等聯名稟控平素通苗之練總吳琪樹並伊子吳恆誼王金奎朱鑫卽朱品三等請分別治罪平圩以淨根株等語當經恆齡等按名拏獲訊明吳琪樹縱子

帶隊攻破傅圩吳恆誼通苗結捻屢犯城鄉王金奎燒殺搶擄朱
鑫卽朱品三先受粵逆僞職繼爲苗逆心腹並續獲逆黨方金鏞
一犯均卽駢誅梟示其翼長全順等前往亳州以南清查圩寨據
報龔紀寺西南姚得洗圍寨閉門抗拒隨派提督傅振邦帶隊往
攻匪眾逃竄旋將姚得洗等拏獲正法並據臬司英翰派員擒獲
著名捻首葛大牛侯豹兒等解營立卽正法至陳國瑞等所獲苗
姓二十一名苗希年一犯已解送到營移交撫臣唐訓方軍營正
法苗逆之妻徐氏逆子連生已咨撫臣轉飭蒙城縣就地正法見
在皖北漸就肅清唐訓方於十一月二十五日前來西洋集會商
善後事宜二十九日仍回懷遠駐紮督同地方官辦理伏思蒙亳
東西相距二百餘里永城縣與潁州府亦南北相距約二百里其
間地廣人稀地方官殊難兼顧見在賊氛甫滅更宜倍加防範查

雒河集爲蒙亳永宿潁各州縣適中之地若於該處增設文武酌添防兵足資控制應請飭下兩江總督安徽巡撫妥籌辦理上諭內閣僧格林沁等奏查驗潁亳等處圩寨擒斬苗黨擒首多名皖北漸就肅清洵足以快人心而申天討所有各該處善後事宜卽著該地方官認真講求妥爲辦理○僧格林沁國瑞奏查李世忠所部勇隊前與陳國瑞派出之隊在下蔡壽州有爭鬪情事嗣據李世忠稟稱有提督朱元興杜宜魁在壽州城內被害等情旋將苗憬開李萬春朱萬濬邵徵詳方長華等提解到營訊據苗憬開供係苗沛霖族姪跟隨苗逆圍困蒙城被大兵擊敗逃至雙澗集被獲經陳國瑞帶赴壽州等處收復城關伊令踞守壽州之李萬春踞守正陽關之朱萬濬先後投誠李萬春供認伊投誠後有豫勝營四五人進城未戴官帽彼時伊派守門之人並苗憬開親

帶十餘人不讓其進以致互相爭鬪卽將豫勝營四五人殺死隨後始知內有提督二人朱萬澹供稱伊購買礮斤並將正陽關釐卡銀錢接濟苗逆又訊據邵徵詳供稱從前保至花翎副將苗逆復叛將伊全家扣住伊遂在蒙城以南蔡圩踞守旋被官兵擊敗遂致信勸張士端投誠並令其撤蚌埠黨眾獻懷遠城池又隨官軍收復各處城關方長華供稱從前保過五品藍翎苗逆派伊守潁上縣城因聞蒙城苗黨被官軍擊敗遂將苗黨趙玉蚤等斬殺獻城出降查苗憬開李萬春朱萬澹三犯均係從前辦練受有官職乃隨苗沛霖叛亂占踞城關實屬罪大惡極苗憬開被擒後隨同收復各處李萬春獻出壽城此二犯原可貸其一死惟將豫勝營提督朱元興等戕害怙惡不悛覈其情罪與朱萬澹均屬法所難宥已於審明後將苗憬開李萬春朱萬澹一併正法其邵徵詳

雖經勸令苗黨歸正並隨同官軍收復城關惟係二品職官任令苗逆主使究屬不知大義張士端於賊勢已敗獻出懷遠投誠後復任令苗黨蘇會雲逃走與殺黨獻城者有閒應請旨將邵徵詳遊擊銜張士端卽行革職均擬發往黑龍江交該將軍嚴加管束方長華當賊勢已敗卽殺苗黨數人獻城投降詢訪潁上輿論咸稱實出無奈尙無倚勢擾民情事應請革職免其置議至副將康錦文帶領苗憬開收復壽州於該犯等滋事時該員不能認真彈壓致有殺害職官之事咎實難辭應請旨將康錦文卽行革職仍畱督臣吳棠軍營差遣以觀後效 上諭苗沛霖族姪苗憬開被擒後經陳國瑞帶赴壽州等處收復城關並勸令踞守壽州之李萬春踞守正陽關之朱萬滌投誠原可貸其一死乃因提督朱元興等四五人未戴官帽欲進壽州輒行互鬪將該提督等殺斃業

經僧格林沁將苗憬開及李萬春朱萬澂一併正法實屬罪有應得至降眾邵徵祥雖經隨同官軍收復城關勸令苗黨歸正惟以二品職官甘爲苗逆主使究屬不顧廉恥張士端因獻出懷遠縣城曾經賞給遊擊虛銜乃投誠後復任令苗黨蘇會雲逃走其爲有意疏縱已可概見花翎副將戴徵祥遊擊銜張士端均著卽行革職發往黑龍江交該將軍嚴加管束方長華前曾保至五品花翎被苗逆倡脅派守潁上縣城聞苗黨被官軍擊敗旋即擒斬苗黨多人獻出縣城尙屬情有可原著革職免其置議副將康錦文帶領苗憬開收復壽州於該犯等滋事之時不能彈壓致有殺害職官之事亦難辭咎康錦文著卽行革職仍畱吳棠軍營差遣以觀後效○諭議政王軍機大臣等僧格林沁等奏查驗潁亳等處圩寨擒獲擒首苗黨多名皖北漸就肅清張之萬奏西路擊賊獲

勝商令蘇克金移營夾擊並誘擒擒首正法進圍鮑寨各摺片類
毫等處圩寨經僧格林沁派令恆齡等前往查驗並攻毀姚得光
賊圍擒獲著名擒首葛大牛侯豹兒並拏苗黨王金奎等犯正法
所辦均屬妥協皖北一帶漸就肅清見在有無匪黨藏匿僧格林
沁仍飭各路實力搜捕以期一律廓清不畱餘孽所有發往黑龍
江之邵徵詳張士端著僧格林沁交地方官卽行起解蘇克金一
軍經該大臣派令帶領馬隊赴豫駐紮魯山張之萬奏恐賊匪東
竄商令該副都統移紮南召左近以利鈔擊據蘇克金覆稱該逆
盤踞山中難期蒞事見飭南召縣並添派官兵偵探該副都統整
隊以待一有確信卽便進兵等語著僧格林沁檄令蘇克金擇要
扼紮如該匪出竄卽會同豫軍實力夾擊毋稍觀望張曜見紮板
山坪若馬隊由張曜營壘之南前進馬步相輔而行先破白土岡

進偏李青店可以制其要害著張之萬飛檄色爾固善等取道南
召鎮平與張曜會合飭吳再升葛承霖分投扼紮誘賊出險與蘇
克金馬隊痛殲醜類以靖地方知府劉成忠參將王文行等軍計
擒擒首黃梅寒鮑景朝二名正法並將悍黨三四百名追捕斬戮
所辦甚妥見在餘逆尙踞鮑寨著毛昶熙督飭各營力圖攻拔卽
乘勝進剿談家園以期節節掃蕩此次攻破余寨擒斬黃鮑二逆
出力各員著張之萬等先行存記俟汝郡肅清彙案保獎張之萬
另片奏副將黃貴誠由信陽帶兵追賊至吳家店因口糧缺乏未
能前進請將該副將摘頂等語黃貴誠追賊未能向前實屬不知
緩急著摘去頂帶以示薄懲已諭知官文等派兵會合夾擊著張
之萬仍責令黃貴誠實力追剿不准稍存畛域之見將此由六百
里各諭令知之○諭僧格林沁等奏蒙亳一帶賊氛甫滅請於適

中之地增設文武酌添防兵以資控制等語安徽蒙亳東西相距二百餘里河南永城縣與安徽潁州府亦南北相距二百里左右數年以來苗捻構亂經官軍勦洗後元兇授首裹脅逃散其間平原曠野地廣人稀加以素習强悍寇盜易滋雉河集爲蒙亳永宿潁適中之地相距均五百里以外該大臣擬請添設重鎮或酌設州縣各官以資治理所籌甚中竊要著會國藩喬松年審度時勢酌量情形遴選職分較大武員統帶數營駐紮該處以資彈壓庶可清理伏莽永消反側其辦理善後各事宜尤屬刻不容緩應如何酌設州縣各缺以專責成之處並著詳細籌商妥議章程具奏唐訓方見已以藩司降補所有前存臨淮之欽差大臣關防一顆著喬松年於到任後派員親齎赴京恭繳以昭慎重將此各諭令知之○諭僧格林沁奏遵旨密陳一摺前因會國藩覆奏李世忠

尙無背叛情形當經密諭該大臣李世忠如不敢往見僧格林沁
卽遵旨調至該大臣軍營散其部眾消患無形茲據僧格林沁覆
奏李世忠背叛情形尙未顯露似難驟繩以法見在金陵軍情緊
要請飭會國藩速調李世忠前赴該大臣軍營助剿曉以大義令
將所踞城池釐卡交出歸官各等語所籌辦法與該大臣前奏均
屬符合卽著會國藩迅將李世忠調赴該大臣軍營一切遵照前
旨酌量妥辦並由該大臣隨時密商僧格林沁毋稍洩漏僧格林
沁原摺畱中另鈔給會國藩閱看將此由六百里各密諭知之○
諭張之萬奏皖匪由桐柏南竄隨州派兵追剿並飛咨楚省撥兵
夾擊等語皖匪於上月二十七日竄撲桐柏固縣寨地方分股由
小林店竄赴楚境另股三四千名進薄桐柏縣城被該處兵團擊
退遂由盤古山等處擁眾南走與前竄楚境之股會合竄擾隨州

之新城集張之萬已嚴飭黃貴誠等拔隊跟蹤堵剿惟隨州新城集一帶四面皆山儻被該匪久踞必致滋蔓難圖著官文嚴樹森迅派得力將弁帶兵前往隨州與豫省官軍兩面夾擊務殲窮寇毋任闌入楚境將此由五百里諭令知之○諭沈葆楨奏籌防東路情形一摺另片奏請飭在籍總兵江忠朝來江接統江忠義所部等語金陵踞匪見經官軍圍逼將來賊勢窮蹙必分股肆竄徽饒各郡縣防剿不容稍鬆昨據左宗棠奏臬司劉典回籍治喪接辦徽防之員恐未必能如該臬司足資捍禦江省東路邊境更宜加意嚴防沈葆楨見派韓進春駐紮樂平並調席寶田陳鴻志等移師於祁景之間聯絡聲勢布置尙屬周妥卽著該撫督飭在防文武員弁認真訓練兵勇嚴密戒備毋得稍有疏虞在籍總兵江忠朝旣據該撫稱其智勇足備著准其調赴江省接統精捷營以

資得力據憚世臨奏茶陵州屬之小田村與江西永甯交界地方見有匪徒聚集經該州訪獲匪首黃桂芳供與龍泉縣鄒木匠謀約鄒永會匪滋事等語永甯等縣土匪疊據沈葆楨飭屬拏辦恐尚有餘孽跼伏竄匿仍著該撫嚴飭各該地方文武逐加搜捕有犯必懲務絕根株毋貽後患將此由五百里諭令知之○諭憚世臨奏防剿黔匪並辦理土匪情形一摺李七爲李幅猷悍黨竄入黎境爲時已久總未見勞崇光張亮基選派勁兵迎頭截擊以致餘燼復然裹脅日眾若不迅速殲除其慮伊於胡底著勞崇光張亮基懷遵前旨趕緊遴派得力兵勇馳赴黎平一帶痛加剿洗該逆見有窺伺大榕江漸入粵境之意張凱嵩務當派兵迎擊勿令賊蹤得以入境憚世臨已飭周洪印移師黎平並令趙福元等於楚粵交界之處周密布置卽著飭令在事員弁聯絡聲援妥籌防

勦不得稍有疏虞該督撫等務當合力同心戮此巨憝儻敢眈域
攸分致令賊氛肆擾何省勦辦不力卽惟該省大吏是問益陽會
匪餘黨竄匿龍陽沅江華容安鄉一帶陰圖糾眾報復經趙煥聯
等督團往捕拏獲龐在恆等多名惟首匪羅明慶等聞風遠颺必
須悉數捕獲至茶陵州匪首黃桂芳耒陽縣匪首李昌英羅良心
等旣經分別訪獲而餘匪亦須搜拏淨盡著惲世臨督飭所屬認
眞稽察嚴拏究治毋令此拏彼竄芽蘖復萌本日沈葆楨奏江忠
義一軍接統乏人請飭江忠朝來江統帶等語著惲世臨傳知在
籍總兵江忠朝迅速前赴江右接統精捷營以副委任將此由六
百里各諭令知之○唐訓方奏查苗逆伏誅後其頭目除先後陣
斃擒斬及此次擒斬儻貫金卽黃毛獸等七十六名並袁有功病
故張士端方長華傅琳珠准其投誠外尙有苗添罄童維翰苗長

春王泳年率黨遠颺見仍飭各路嚴密查拏固不使兇惡倖逃尤不使善良波及以冀仰副 聖主除暴安良之至意至皖北自張落刑苗沛霖相繼煽亂十有餘年民間築圩自固軍械日多尤當於大兵未撤之時爲一勞永逸之計已據報平圩三百一十處追繳大小槍礮一千五百四十三件長矛三千四百八十四根遠近士民無不鼓舞歡欣自謂重瞻天日其有首鼠兩端者卽屬自外生成仍宜隨時搜拏懲辦報聞○庚子以 祫祭 太廟 上前期親詣行禮○諭議政王軍機大臣等前因總理各國事務衙門奏陳辦理俄國分界情形當經諭令明誼明緒於會議時徑行酌辦不得游移瞻顧茲據明誼等奏行文俄國約派使臣前來商辦安插內服哈薩克等人眾一摺俄國分界事宜已經明誼等行文該國准照該使臣議單辦理並約該國派員前來商辦換約見在

大雪封山該國使臣前來約在明春著明誼等卽遵照前次寄諭將分界事宜徑行斷結不得再行咨商總理各國事務衙門以致往返稽延總以妥速爲要不可意存諉卸至烏梁海蒙古並內服之哈薩克布魯特及伊犁距近邊卡居住之索倫四愛曼人等有礙生計之處亦應豫爲籌畫其塔城所屬藩部卽由明誼等查明情願內附人眾若干一面查明卡內空曠處所以便於定界後酌籌內徙並著明誼等速卽知照常清麟興廣鳳等迅將所屬蒙古烏梁海及哈薩克布魯特一併豫籌安置處所妥議章程辦理將此由五百里各諭令知之○辛丑諭議政王軍機大臣等林文察奏克復斗六土城嘉義肅清移兵彰化一摺官軍攻克彰化後林文察會同總兵曾元福進攻斗六逆巢並將附近逆黨巢穴數十莊悉數攻毀復誘令斗六賊匪出巢設伏擊敗悍賊乘勢攻拔斗

六土城陣斬甚多擒獲僞軍師元帥等勦辦尙屬認真惟匪首戴萬生見在逃往彰化洪逆所往之北勢浦莊與林逆所踞之四塊厝地方皆爲該逆老巢族類甚繁且恐勾結內山番族復致滋蔓著徐宗幹卽飛速行知林文察並飭曾元福丁曰健合力進攻務期破毀老巢將戴萬生洪機林顓晨三逆悉數擒斬其首匪陳啞狗弄所踞之大突等莊亦著速行攻克將匪首一併殲擒毋任再行竄逸林文察務當乘此軍威力加掃蕩並與曾玉明丁曰健和衷商辦迅奏膚功毋得稍分畛域將此由五百里諭知徐宗幹並傳諭林文察曾玉明丁曰健知之○壬寅諭議政王軍機大臣等李雲麟奏會攻漢郡分兵畱守興安並派水陸各營堵勦藍逆股匪一摺據稱劉蓉所部於十二月初三日由甯羌鐵鎖關進趨褒沔並飭南路湘果各軍由青石關同時並進催令該京卿迅擣西

鄉並咨明四川總督分派唐友耕畱防太平之四千餘人會剿探聞西鄉洋縣踞匪因川軍雲集圖竄漢陰興安東犯襄郡見已分擾石泉之馬家寨等處經該京卿派兵擊退藍逆一股擾及上津欲由甲河等處偷渡回川已飭派出之兵會梁作楫一軍追剿興安新舊兩城已派兵畱守俟與劉蓉會晤共商安策等語覽其所奏仍係豫籌布置須俟與劉蓉會晤方可共商進兵劉蓉見已行抵何處著卽催集各軍會剿新集賊巢李雲麟迅飭各軍進搗西鄉以成三路會剿之局務須督飭各將弁認真剿辦切不可徒託空言致干咎戾李雲麟進止著劉蓉仍遵前旨妥籌調度另片奏石泉縣知縣陸堃於賊至則獻物以求和賊去則殺人以滅口該京堂派防石泉陸堃不令進城石泉爲李雲麟進兵要路果如所奏實屬目無法紀關係非輕前此龍常與陸堃互訐之案孰虛孰

實著劉蓉將此次李雲麟參劾陸埜各情彙入前案一併秉公查辦據實覆奏原片著鈔給劉蓉閱看將此由六百里各諭令知之○是月豁免山東鄒縣等三縣被擾陝西華州等二十五州縣被擾新舊額賦並孝義等六廳縣上年本年道倉糧石蠲緩直隸開河等三州縣被水新舊錢糧地租暨出借倉穀兩淮富安等十四場被水被風竈地節年錢糧湖南澧州等十五州縣暨岳州衛被水被旱被擾新舊額賦緩徵浙江餘姚等四縣被擾被旱下忙錢糧暨石堰場應徵竈課山東臨清等八州縣被水被蟲被擾節年額賦暨滕縣來年上忙錢糧展緩湖北沔陽等二十州縣被水被旱新舊正雜額賦漢陽等九州縣被水新舊漕糧陝西耀州等六州廳縣被擾新舊額賦暨乾州等二十五州縣來年上忙錢糧賑吉林甯古塔等處被水旗民並給修屋銀免被災較重新舊銀穀

緩徵各項額賦○是歲朝鮮入貢○會計天下民穀數除奉天江蘇福建雲南廣西浙江陝西甘肅安徽貴州等省未經冊報外直隸等省通共大小男婦二萬三千三百九十五萬八千四百三十五名口存倉米穀三百萬一千二百四十六石八斗六升五合七勺